

Diidx Xcuent Jesucrist Nani Bacuaa San Marcw

Baluu Juan ni rutiobnis

(Mt. 3:1-12; Lc. 3:1-9, 15-17; Jn. 1:19-28)

¹ Scree gusloj diidx xcuent Jesucrist, Xi'n Dios.

² Si'cni bacuaa toIsaías, ni gunii xtidx Dios, che räjp Dios:

Bahuii gan, guxhalä ni chanä xtidxä, ganidni chääni lojlu te guzucheeni xnezyujlu.

³ Riejn xse' ni rbedxa' nez loj reyubijdz:

“Coļyunsa'c xnezyuj Dad, coļslii rexnezyulajzni.”

⁴ Biricaj Juan ni rutiobnis nez loj reyubijdzga. Rāpgajcni nanabpac gusiechlajzreni, tiobnisgajceni, te jia xtojlrēni. ⁵ Riādcuadiajg xhidajl reni rbājz Judea, nājza reni rbājz guedx Jerusalén. Dxejcti cheni ruxhobdojlrēni lo Dios, rustiobnis Juanreni neņ gueu Jordán.

⁶ Xhajt Juan nacchee con guichlajd cameii, xsindoorni nacchee con guiid, niluxh gudajwni guxha't nājza dzunbäserguijxh. ⁷ Caguluiini rebejņ, rāpgajcni:

—Detzä siääd tej nani sajcro loä, nani nicla di nungäjl surloä, cuää xcura'chni. ⁸ Narä abatiobnisä la'tu con nis, biädla laani guxhalni Sprit Dxa xten Dios te cuääzni neņ lastootu. Si'c gustiobnis nani jiääd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹ Dxejc, nen redxejga, birii Jesús guedx Nasare't ni yu' Galilee. Dxejcru batiobnis Juan Jesús nen gueu Jordán. ¹⁰ Che birii Jesús nen nis, bahuiini bixal guibaa. siädyäjt Sprit Dxi xten Dios yejcn si'c te palom. ¹¹ Dxejcti guibaali biejn xse' te ni räjp:

—Luj najclu xi'nä ni sanälazä; rbanälazduxhälu.

Bateed bendxab prueb Jesús

(Mt. 4:1-11; Lc. 4:1-13)

¹² Sas baxhal Sprit Dxi xten Dios Jesús lo reyubijdz. ¹³ Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoob Jesús xtiidxni. Dxejcru biääd reangl xten Dios, biädhuiireneni.

Gusloj Jesús xtzuunni

(Mt. 4:12-17; Lc. 4:14-15)

¹⁴ Basälreni Juan nen latzguiib. Dxejcti huij Jesús nez Galilee, huiluiini xtidx Dios. ¹⁵ Dxejc räjp Jesús:

—Abidzujñ dxej, luxh yälrnibee xten Dios abidzujñ gajxh. Colsiejch lajztu, colchalilajz xtidx Dios.

Gurejdx Jesús tajp bejn ni rniaaz bäjl

(Mt. 4:18-22; Lc. 5:1-11)

¹⁶ Sasajti Jesús nez ro' nis xten Galilee, che bahuiini lo Simón näjza loj Andrés bejtz Simón. Cazälreni xquijxhreni lo nis, sa'csi rniaazreni bäjl.

¹⁷ Dxejc räjp Jesús lojreni:

—Coltanajl narä, te gunä cueddxtu bejn lacuaa ni guiniaaztu bäjl.

18 Lagajc dxejc basa'nreni rexquijxhreni, sanätirenini.

19 Dxejc gusaj Jesús sche'n, sas bahuiini loj Jacoob näj Juan, rexi'n Zebedeo. Cayunsa'creni xquijxhreni neñ xcanuureni. 20 Guredxgajcni guiro'preni, dxejcti laareni basa'nreni xtadreni Zebedeo neñ canuu, näjza rexmosni, sanätireni Jesús.

*Te bejn nani guyu' beñdxab neñ lastooni
(Lc. 4:31-37)*

21 Bidzujntireni guedx Capernaum. Dxejcru sabd, dxej ni rusilajz rexpeñ Israel, biu' Jesús neñ guidobäz xten rexpeñ Israel. Dxejcti baluii Jesús rebejn ni tre' ro'c. 22 Bidxelojni rebejn xtiidxni, sa'csi caguluiinireni si'cpac te ni rnibee, xhet si'cdi remastr xten leiidi. 23 Neñ xquidobäzreni yu' te bejn yu' te beñdxab neñ lastooni. Beñdxabga guredxa', räjpni:

24 —Jesús, ni siääd Nazare't, ¿xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu beñdxan ni siääd lo Dios.

25 Dxejcti gudidxa' Jesús lo beñdxabga, räjpni lojni:

—Basäuu ro'lu, birii neñ lastoo niguiire.

26 Sas beñdxabga batienguij niguiiga, luxh cabedxa'ni biriini neñ lastoo niguiiga. 27 Bidxejbti guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj rebeñdxab, luxh ruzoobreni xtiidxni.

28 Di niacjaa gucbee rebejn guideb nez Galilee xhi rujn Jesús.

*Basiajc Jesús xnan suegr Pedr**(Mt. 8:14-15; Lc. 4:38-39)*

²⁹ Che biriireni xquiidobäz rexpejn Israel, huinä Jesús Jacobo näj Juan rolijz Simón näjza Andrés.

³⁰ Luxh xnan suegr Simón naga', yu'ni xliaa. Dxejc räjpreni lo Jesús:

—Cayacxhuuni.

³¹ Dxejcti gubig Jesús lojni, gunaažni ñaani, guläsnini; lagajc dxejc biriini xliaa. Dxejc gusloj cayunireni.

*Xhidajl beñracxhuu basiajc Jesús che huääz gubijdx**(Mt. 8:16-17; Lc. 4:40-41)*

³² Che huääz gubijdx, luxh abiu' guxhijn, biädnäreni guiraa rebeñracxhuu loj Jesús, näjza renani yu' beñdxab neñ lastooni. ³³ Luxh guideb guejdxga bidojp ro' yu'ga. ³⁴ Basiajc Jesús xhidajl renani rajc garen-garen yälguijdx. Niluxh gulääžani xhidajl beñdxab, niluxh dini nusaan ninii rebeñdxabga, sa'csi najnreni chu najcni.

*Baluii Jesús nez Galilee**(Lc. 4:42-44)*

³⁵ Che bara yääl, cäyru bistie Jesús, biriini sääni te laad cadro ruti bejn. Ro'c cabejdx-canabni loj Dios. ³⁶ Dxejcti Simón näj resa'ni huitiilreni Jesús.

³⁷ Che bidxälrenini, räjpreni lojni:

—Guiraa rebejn caguillu.

³⁸ Dxejc räjp Jesús lojreni:

—Coļcho' reguejdx ni yu' gajxh, te gusuleä xtidx Dios ro'c. Par ni'cpac biälä.

³⁹ Dxejcru cuansaj Jesús guideb nez Galilee, caguluiini xtidx Dios neñ reguidobäz xten rexpejn

Israel. Gunibeezani birii reben_{dx}ab ne_n lastoo xhidajl rebejn.

Basiajc Jesús te bejn ni ral tiejxhni

(Mt. 8:1-4; Lc. 5:12-16)

⁴⁰ Gubig te be_nracxhuu ni ral tiejxhni loj Jesús, bazuxhijbni. Dxejcti räjpni lojni:

—Narä nanä sajc gusiajclu narä palga r_lajzlu.

⁴¹ Balaslajz Jesús be_nracxhuuga, gunaazni naani, räpgajcni:

—Rlazä jiajclu. Biajc naj.

⁴² Cheni guniini scree, biacgajc be_nracxhuuga.

⁴³ Dxejcti gulunejz Jesús bejn_{ga}. Per räpxgaani lojni:

⁴⁴ —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani räjp toMoisés gudeed bejn lo Dios si'c te seen, te gacbee rebejn abiajclu.

⁴⁵ Dxejc säa bejn_{ga}. Sas gusloj cayujyni diidx lo rebejn xcuent guiraa nani guj_cni. Ni'cni diru niajcdi niu' Jesús nicla tej guejdx. Cansajni te laad cadro ruti bejn. Niluxh guiranejz rii rebejn, siädhuiireni Jesús.

2

Basiajc Jesús te bejn ni di guniib

(Mt. 9:1-8; Lc. 5:17-26)

¹ Che agudejd balti dxej, biusac Jesús ne_n guedx Capernaum. Dxejcti biejn diajg rebejn arbäjn_i.

² Bidopgajc xhidalduxh bejn. Gudxaj ne_n yu'. Nicla rolä' di niajl nisiujreni. Dxejcti caguluii Jesús xtidx Dios lo rebejn. ³ Dxejcti bidzuj_n tajp bejn, nuureni te bejn ni digacti guiniib; siädnärenini lo

Jesús. ⁴ Luxh di niajcdi nidzujnreni cadro suga' Jesús, sa'csi yu' xhidajl bejn ro'c. Ni'c baxhalreni yejc yu' nejc cadro sujni. Dxejcru cadro baxhalreni basiäjtreni da' ni naga' beñracxhuuga lojni. ⁵ Che bahuii Jesús rililajzreni, dxejc räjpni loj beñracxhuuga:

—Xi'nä, agubicaj rextojllu.

⁶ Sas gaii bejn ni ruluu leii ni sobga' ro'c bejnreni xhigab neñ lastooreni, naareni: ⁷ “¿Xhicuent rni niguiire scree? Caniyajni Dios; rut rajcdi rudzucaj dojl. ¡Diostis rajc rudzucaj dojl!” ⁸ Dxejcti gucbegajc Jesús xhi xhigab cayujnreni. Dxejc räjpni lojreni:

—¿Xhicuent rujntu xhigab si'c neñ lastootu?

⁹ ¿La guyasiru gäbni loj beñracxhuure: “Agubicaj rextojllu”, o la gäbni: “Huistie, cua' xta'lu, gusaj”? ¹⁰ Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, cania loj beñracxhuure:

¹¹ —Lojlu rniä, ¡Huistie, cua' xta'lu, huij rolizlu!

¹² Lagajc dxejc huistie beñracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

Gurejdx Jesús Leví

(Mt. 9:9-13; Lc. 5:27-32)

¹³ Dxejcru gubisac Jesús ro' nis xten Galilee, luxh che bidojp guiraa rebejn lojni, baluiini xtidx Dios lojreni. ¹⁴ Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

¹⁵ Dxejc sobga' Jesús cayajwni rolijz Leví. Luxh sobganäj Jesús xhidajl reni rusquijx, näjza rebeñdojl ni di chasanäj leii, näjza rexpejn_{pacni}, lo mex. Xhidajlreni tre', luxh sanajlreni Jesús.

¹⁶ Dxejcru rebejn ni ruluii leii näj refarisee, che bahuiireni cayaunäjni renani rusquijx näjza rebeñdojl, räjpreni loj rexpejn_{pac} Jesús:

—¿Xhicuent rbenäj xmastrtu reni rusquijx näj rebeñdojl, luxh raunäjnireni, ränäjnireni?

¹⁷ Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquiin doctoor. Dina niädtedxä rebeñsa'c, biädtedxä rebeñdojl, te gusiech lajzreni.

Gunabdiidxreni loj Jesús xcuent yäl_{rucua}'n

(Mt. 9:14-17; Lc. 5:33-39)

¹⁸ Cagucua'n rexpejn Juan näj rexpejn refarisee, renani najc rebeñguidoo loj guedx Israel. Dxejc biääd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejn_{pac}lu di gucua'n?

¹⁹ Dxejcti räjp Jesús lojreni:

—¿La rucua'n rebejn ni rdon chää cadre ru' yäl_{ruchnaa} che meer suga' bi'n? Che meer suga' bi'n lojreni, direni gucua'n. ²⁰ Per sidzujn dxej sibicaj bi'n lojreni, dxejc sii sucua'nreni.

²¹ 'Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhi-roobruni räjs. ²² Rutza rusäl_{di} bin ni gajd guilaj

neŋ guidyux ni abigaa. Sa'csi bin ni gajd guilajga sutiäjsni guijdga che guilajni, luxh sinijt binga näjza guijdga. Ni'cni nanab gusälni bincoob neŋ guidcoobza.

Batojp rebejn ni rinajl Jesús triuu sabd

(Mt. 12:1-8; Lc. 6:1-5)

²³ Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu. ²⁴ Dxejc räjp refarisee, renani najc bēnguidoo loj guedx Israel, loj Jesús:

—Arniä, ¿xhicuent rujn rexpejn paclu dzuun ni di guchaag gunni neŋ dxej ni rusilajznu, ä?

²⁵ Dxejcti räjp Jesús lojreni:

—¿La gajdtu gol nani bejn toDavid te huält, laani näj resa'ni, ä? Che biäädx xhi gauureni, gulaanreni. ²⁶ Biu' David neŋ xyu' Dios cheni guyu' toAbiatar loj Dios. Abiatar saj cru loj rebixhojz ni guyu' neŋ xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

²⁷ Räjpza Jesús lojreni:

—Dios bejn dxe sabd sa'csi najnni naquiin pac gusilajz bejn. Dini niujn sabd te gapda bejn ni.

²⁸ Ni'cni narä, Xi'n Dios ni gujc Niguii, näjza sabd rnibeä.

3

Niguii ni nabidz te naani

(Mt. 12:9-14; Lc. 6:6-11)

¹ Biu' Jesús stehuält neŋ xquidobäz rexpejn Israel. Ro'c yu' te niguii nani nabidz te naani.

² Niluxh ro'c cagula'tz rebejn̄ Jesús don la susiajcn̄i niguiiga sabd, dxej ni rusilajz rexpejn̄ Israel, sa'csi rlaizreni cue'creni xquejni loj nani rnibee rexpen̄ Israel. ³ Dxejc räjp̄ Jesús lo niguii nani nabijdz̄ ñaani:

—Huistie, guzuj galäiire.

⁴ Dxejcti gunabdidxgajcn̄i loj gaii rebejn̄ga, räjpni:

—¿La laaca gunni dzunza'c, o la dzunguijdx, sabd, ä? ¿La suslaani yäl̄nabajn̄, o la sugu'tni?

Luxh laareni biacdxireni. ⁵ Dxejc nadxe'ch bahuii Jesús lojreni, luxh guc-huin laizni, sa'csi guc najd laizreni. Dxejc räjp̄ Jesús loj niguiiga:

—Baslii ñaalu.

Dxejcti basliini ñaani. Biajctini. ⁶ Dxejcru bi-unejz refarisee. Guslogajcreni caguchaagreni didx con reni nadxaag Herodes, te don xho ju'treni Jesús.

Xhidajl bejn̄ bire' ro' nis

⁷ Jesús näjza rexpejn̄pacni sääreni ro' nis, luxh xhidajl ben̄ Galilee birinajlni. ⁸ Che gojnreni redzunro ni rujn̄ Jesús, xhidajlreni biäd. Yu'reni birii Judea, yu'reni birii guedx Jerusalén, yu'reni birii Idumea, yu'zaren̄i birii nejz stelaad gueu Jordán, biriizaren̄i nez guedx Tiro, näj nez guedx Sidón, biädhuiireni loj Jesús. ⁹ Ni'cni räjp̄ Jesús loj rexpejn̄pacni quiilreni te canuu, te na'c gutää reben̄xhidaalgani. ¹⁰ Abasiajc Jesús xhidajl ben̄racxhuu, ni'cni guiraasi ben̄racxhuu caxa't lojni, te can̄reni te jiajcreni. ¹¹ Niluxh che rhuii reben̄dxab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

¹² Dxejcti Jesús gudidxa' lojreni te na'c niäjbreñi chu najcni.

Gule Jesús tzubitiop bejn loj reni rinajlni

(Mt. 10:1-4; Lc. 6:12-16)

¹³ Birii Jesús sääni lo te dajne' cadro gurejdxni renani rlajzni cueni. Gubigtireni lojni. ¹⁴ Dxejcti guleni tzubitiop'reni te sanäjreni laani, te guxhalnireni chaluiireni xtidx Dios; ¹⁵ te ga'preni yälrnibee te gusiajcreni beñracxhuu, te cuääzarenibee rebeñdxab. ¹⁶ Retzubitiop bejn ni gule Jesús najc: Simón, ni gulälajzani Pedr. ¹⁷ Dxejcti Jacoob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. ¹⁸ Näj Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni di guidxejb rnigajc, ¹⁹ näj Judas Iscariot, ni bato' Jesús loj reni rdxech-lajz lojni. Sä'tireni rolijz te dade'.

Yälrnijaj loj Sprit Dxañ xte Dios

(Mt. 12:22-32; Lc. 11:14-23; 12:10)

²⁰ Dxejc bidopsac rebeñxhidaalga; nicla niajc niaunäj Jesús rexpejñpacni. ²¹ Che biejn diajg resa' Jesús dee, biädxhiirenini, sa'csi naareni, yejñcni cayajc.

²² Rebejñ ni ruluii leii ni birii guedx Jerusalén bidzujñza lo Jesús, dxejc räjpreni:

—Beelzebú, nani rnibee rebeñdxab, yu' nen lastoo niguiire. Niluxh nani rnibee rebeñdxab rudeed yälrnibee lo Jesús te cuääni beñdxab.

²³ Dxejc gurejdx Jesús rebejñga, bijyni te cuent ni ruluii lojreni, räjpni:

—¿Xho gurilaagw bendxab lagajc sabendxabni?
 24 Palga rebejn xten te yälrnibee la'reni, luxh tilnä
 te cuaani ste cuaaga, di yälrnibee chu xchej.
 25 Palga te famil rdilnä lagajc sa'ni, di familga
 chu xchej. 26 Palga bendxab nani rnibee tilnä
 lagajc laani, di xcälrnibeeni chu xchej, sa'csi ni'c
 gun luuxni.

27 'Rut gacdi jiu' rolijz te niguidaan, cuanni xhix-
 htenni, palga dini gulibxgaani, si'ctis sajc cuanni
 xhixhtenni.

28 'Rniliäpac lojtu guiraa dojl näjza yälrnijaj xten
 rebejn sajc jia. 29 Nani guinijaj Sprit Dxiän xten
 Dios, digacdi guibicaj rextojlni, anuutisni xtojlni
 par tejpas.

30 Räjpni si'c sa'csi caniireni yu' bendxab neñ
 lastooni.

*Xnan con rebetzhuin Jesús
 (Mt. 12:46-50; Lc. 8:19-21)*

31 Dxejcru bidzujn xnan Jesús, näj rebetzhuinni.
 Direni niu', baxhaltisreni chu huitejdxni. 32 Rebejn
 ni sobga' gabi Jesús räjpreni lojni:

—Xnanlu näj rebejtzlu suga' ro lä', caguuilreni
 luj.

33 Dxejcti räjp Jesús lojreni:

—¿Chu reni'c najc xnanä näj rebetzä?

34 Bahuigajcni loj renani sobga' gabini, dxejc
 räjpni lojreni:

—Redee najc xnanä, rebetzä. 35 Chutis ni rujn ni
 rlanj Dios, ni'c najc betzä, bisianä, näjza xnanä.

4

Xcuent niguii ni sale'c binij
(Mt. 13:1-23; Lc. 8:4-15)

¹ Suga' Jesús ro' nis guslosac caguluiini xtidx Dios, luxh bidojp xhidajl bejn cadre suga'ni. Xhidalduxh najcreni, ni'cni biu' Jesús neñ te canuu ni suga' ro' nisga. Dxejcti gurejni neñga, biääd guiraa bejn bia'ntireni ro' nis. ² Dxejc balui- inireni guiraloj, ganax cuent ni ruluu guniini. Che caguluiini, räjpni lojreni:

³ —Gucuardiajgtu dee. Guyu' te niguii. Biriini sale'cni binij. ⁴ Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. ⁵ Stee lajt biajb binijga neñ guij cadre xheti xhidajl yuj. Binijga gulengajcni, sa'csi xheti xhidajl yuj ro'c. ⁶ Dxejc, sa'csi lo jiaa yu' xlobaani, che birii gubijdx, bigolni, gubijdz- tini. ⁷ Stee lajt biajb binijga neñ yaguejch. Dxe- jcti biroob reyaguejchga, luxh bejnreni balaa loj binijga, ni'cni gujcni ganax bilii. ⁸ Per stee lajtga biajb binij lo yusa'c. Gulejn reyäjlgä, guroobreni, gucsa'creni. Yu'reni cuaj galbitzuu xob, yu'reni cuaj gayojñ xob, yu'zarenı cuaj tegayuu xob.

⁹ Dxejc räjpni lojreni:

—Chutis ni rıajz guisieed, sucuardiajgni.

¹⁰ Che asii xhidajl bejn, rebejn nani suga' gajxh cadre suganäj Jesús guitzubitio'p xpejnıpacni gun- abdiidx lo Jesús xhi säloj cuentre. ¹¹ Dxejc räjp Jesús:

—Dios abejn gacheetu te gantu xho najc yälxhiga'tz xten xcälrnıbee Dios nani najc xhiga'tz ñajli. Niluxh lo ste'ca bejn con cuenttis rniä guiraa

recosre, ¹² te mase cahuiireni direni gumbee, te mase cayiejn diajgreni, direni gacbee. Scree gacni, te na'c gusiejch lajzreni, te na'c guibicaj xtojreni.

¹³ Räjpzani lojreni:

—¿La ditu gacbee cuentre? ¿Xhocha gacbeetu xhidajlru cuent? ¹⁴ Niguiire nani sale'c binij najc si'c te nani ruluu xtidx Dios. ¹⁵ Yu' bejn ni najc si'c binij ni biajb cuä' nezyuj: riejn diajgreni xtidx Dios nani ruluu bejn. Dxejc che jiejn diajgreni xtidx Dios, riäd Satanás rbägajcni xtidx Dios ni yu' neñ lastooreni. ¹⁶ Yu'za rebejn ni najc si'c binij ni biajb neñ reguij, renani che jiejn diajgreni xtidx Dios, rbaa lajzreni rca'reni diidxga. ¹⁷ Niluxh direni nisiudzu'tz, sa'csi guxii huili lajzreni. Che rdejdreni trabajw o che rusacsí bejnreni xcuent xtidx Dios, rusaanreni xtidx Dios. ¹⁸ Yu'zarení najc si'c binij ni biajb neñ yaguejch, riejn diajgreni xtidx Dios, ¹⁹ dxejc che ru'rurení yärsia' xcuent recos guedxliujre, rsia' lajzreni ga'preni meel, rla-jzreni ga'prurení guiraloj recos, dxejc riu' redee neñ lastooreni, rusäuuni lo xtidx Dios, xlia'si biejn diajgreni xtidx Dios. ²⁰ Yu'za bejn ni riejn diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzoo xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

*Xhet yuchetzu'tzdi ni di guidzujn dxej sisäbdiidx
(Lc. 8:16-18)*

²¹ Räjpza Jesús lojreni:

—¿La riädnätu te bajl te suuni dejtz te alm, o nen te loon, ä? ¿La xhet nanabdi suuni jiaa te guzani-jni, ä? ²² Xhet yuchetzu'tzdi ni di guidzujñ dxej sisäbdiidx. Xhetiza xhicos naga'tztis. Naga'tzni ñaj, niluxh sidzujñ dxej sule'ni. ²³ Pal yu' chu rlajz guisieed, sucuadiajgni.

²⁴ Räjpa Jesús lojreni:

—Colyunxгаа xhigab rediidx ni riejn diajgtu. Nani rusäلتu loj xhigabtu, ni'cza guniidx Dios xca'tu, luxh sisiojbru yejc ni xca'tu. ²⁵ Renani rajp che'n yälñajñ, lojreni sudeedru Dios yälñajñ. Luxh renani xhetru rusälđi loj xhigabreni, sudzucaj Dios yälñajñ nani rajpreni.

Xcuent binij ni roob

²⁶ Guniiza Jesús lojreni:

—Yälñibee xten Dios najc si'c rsiajc te niguii che rbe'cni binij lo yuj, ²⁷ dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni. ²⁸ Acanajñ yujga rajc binij lojni. Galoo rii cuane'ga, sas rii doj lojni. Dxejcru rdxaj bejdze' neñ dojga. ²⁹ Dxejcti che aguyajl bedze'ga, ruxhałni chu ritiuugni, sa'csi abidzujñ dxej ni guidojpni.

Xcuent bedz muxhtas (Mt. 13:31-32; Lc. 13:18-19)

³⁰ Räjpa Jesús:

—¿Xhini'c najc si'c najc xcälñibee Dios? ¿Xhi te cuent guiniinu te guiluiinuni? ³¹ Si'c te bedz muxhtas ni rbej loyuj, si'c najcni. Bedz muxhtas najcni bedz bäze'ru loj guiralii bedze' ni yu' loj guedxliuj. ³² Dxejc che agurejni, roobni, rajcni

yagruru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpalaani.

Si'c baluii Jesús ganax con cuent
(Mt. 13:34-35)

³³ Si'c ruluii Jesús rebejn̄ xtidx Dios guniini xhidal cuent sa' redee, si'ctis ni rajc racbeereni.
³⁴ Con recuent ni ruluiitis gunii Jesús lojreni. Niluxh lo rexpejn̄pacni basule'ni guiraa recuentre.

Rusiacdxi Jesús bej näj nisdo
(Mt. 8:23-27; Lc. 8:22-25)

³⁵ Lagajc gudxejga räjpni loj rexpejn̄pacni:
—Coļcho', chonnu stelaad nis xten Galilee.

³⁶ Basa'ntireni rebejn̄, sanätireni Jesús neñ canuu cadre sobgajcni. Dxejcti sgaii canuu sanajlni. ³⁷ Chela gubi' te beduxh, gusloj cayu' nis neñ canuuga. Cadxaj canuuga nis. ³⁸ Nagayejs Jesús dejtz canuuga, nagayejsni. Bacuäänreni Jesús, räpgajcreni lojni:

—Dad mastr, ¿la dilu jiu siääznu neñ nis, ä?

³⁹ Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgajc bej, biacdxini. ⁴⁰ Räjp Jesús loj rexpejn̄pacni:

—¿Xhicuent cadxebduxhtu? ¿La ditu chalilajz xtidxä, ä?

⁴¹ Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoo-breni xtiidxni?

5

Nigui Gadara ni yu' bendxab neṅ lastooni
(Mt. 8:28-34; Lc. 8:26-39)

¹ Bidzujntireni stelaad ro' nisga, lo yuj xten Gadara. ² Si'ctis ni birii Jesús neṅ canuu, biädgajc te niguii lojni ni birii neṅ rebiliää cadro rga'tz beṅgut. Yu' bendxab neṅ lastoo niguiiga. ³ Rbäjzni neṅ rebiliääga luxh rut rajcdi rucuaduuni, nicla con cadeṅguiib. ⁴ Xhidajl huält agacbacuaduureni ni', ṅaa niguiiga con cadeṅguiib, luxh litis batiuugni recadeṅguiibga, rut rajcdi rusiacdxini. ⁵ Si'ctis canzajni, dxej, yääl. Rbedxa'ni neṅ redajn, neṅ rebiliää, luxh cagutiugni tiejxhni con reguij. ⁶ Che bahuiini loj Jesús zijtru, baxuṅni huichaglojni Jesús, bazuxhijbni lojni. ⁷ Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsílu narä.

⁸ Sa'csi agac cayäjb Jesús lojni:

—Luj, bendxab, birii neṅ lastoo niguiiga.

⁹ Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidalro, sa'csi xhidajl najcnu.

¹⁰ Sanuutis canabni lo Jesús na'c guxhalni re-bendxabga ste'ca guejdx. ¹¹ Ro'c tre' xhidalduxh cuch cuä' dane'ga, cayajwreni. ¹² Dxejc gunab re-bendxabga loj Jesús, räjpreni:

—Baxhal nuure loj recuchre te jiu'nu neṅ lastooreni.

13 Dxejcti basaan Jesúsreni. Biriiti reben_{dx}abga ne_n niguiiga, dxejc biu'reni ne_n lastoo recuchga. Yu' si'cti tiop mi_l cuch ro'c. Baxu_n recuchga, dxejc birolreni ro' guilaj, bitejbreni ne_n nis, gujttireni ne_n nisga.

14 Renani cayajp recuchga baxu_nreni, huiyei-ireni diid_xga ne_n guej_{dx}, näjza loniaa. Dxejc biääd bej_n biädhu_{ii} nani guj_c ro'c. 15 Che bidzuj_nreni cadre suga' Jesús, bahuiireni loj niguii nani guyu' reben_{dx}abga ne_n lastooni. Sobga'ni ro'c, najcwni xhajbni luxh nasa'c yej_{cni}. Niguiire najc nani guyu' ben_{dx}ab ni laa Legión ne_n lastooni. Bidxejbti rebej_n nani bahuii lojni. 16 Dxejcru rebej_n ni bahuii xhi guj_c ro', huiyeiireni diid_x xho guzajc niguiire nani guyu' ben_{dx}ab ne_nni galoo, näjza nani guzajc recuch. 17 Dxejc gusloj canabreni loj Jesús jiunejzni.

18 Che biu' Jesús ne_n canuu, niguii nani guyu' ben_{dx}ab ne_n lastooni gunabni loj Jesús, räjpni:

—Huinä narä.

19 Per di Jesús nusaan nijni. Räjp Jesús lojni:

—Huij rolijzlu, lo resa'lu. Huiyeii diid_x lojreni xho bennäj Dadlu, näjza xho balaslajzni luj.

20 Sä'ti niguiiga, gusloj cayujy_{ni} diid_x ne_n reguej_{dx} xten Decápolis xho bennäj Jesúsni. Guiraa rebej_n bidxeloj.

Xindxa'p Jairo näjza gunaa ni bahual_l xhajb Jesús (Mt. 9:18-26; Lc. 8:40-56)

21 Che bidzu_{nsac} Jesús stelaad ro' nisga ne_n canuu, bidzuj_n xhidalduxh bej_n cadre suga'ni. Bia'nti Jesús ro' nisga. 22 Dxejcru biääd te niguii nani laa Jairo, ni rnibee ne_n xquidobäz rexp_{e_n}

Israel. Che bahuini loj Jesús, bazuxhijbni lojni.
²³ Canabpacni lojni, räjpni:

—Xindxapä'ä acayejt. Gudaa, guzujlu ñaalu yejcní, te jiajcní, te guibajñni.

²⁴ Sanäti Jesús bejnga. Xhidajl bejn sanajlni, luxh cagutäärenini. ²⁵ Loj rebenxhidaalga yu' te gunaa ni agujc tzubitio'p ijz racxhuuni yälguidxbäii. ²⁶ Agudedduxhni trabajw, abahuii xhidajl doctoorni. Xlia'si abanijtni guiraa nani räjpni, luxh xhet racnäjdini, alga rxuuruni. ²⁷ Sa'csi biejn diajgni xhini'c canii rebejn xcuent Jesús, gubig gunaaga nez dejtz Jesús, guideb neñ rebejn, bahualni xhajn Jesús. ²⁸ Cayujñni xhigab, naani: “Palga narä falä xhajbtisni, siacä.” ²⁹ Lagajc dxejc guläjz caxe' xtiejñni, gucbeeza tiejxhni abirii xcälracxhuuni. ³⁰ Gucbegajc Jesús yu' chu abasiajcní. Gubiregajcní neñ rebenxhidaalga, räjpni:

—¿Chuni'c bahual xhabä?

³¹ Dxejcru räjp rexpejñpacni lojni:

—Rhuiilu benxhidaal cagutäälu, luxh ñaalu: “¿Chuni'c bahual xhabä?”

³² Sas cahuii Jesús nez ree, nez rec, te fini loj nani bahualni. ³³ Dxejc bidxejb gunaare, racsejsni, sa'csi gucbeeni xhini'c gujcní. Dxejc biädni, bazuxhijbni loj Jesús, räbliini loj Jesús guira'ti ni bejñni. ³⁴ Dxejc räjp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolijzlu, abiajlc xcälracxhuulu.

³⁵ Canisijc Jesús si'c che bidzujñ renani birii rolijz dade' ni rnibee neñ xquidobäz rexpejñ Israel. Räjpreni:

—Agujt xindxape'lu. ¿Xhicuent rusieedrulu Dad mastr?

³⁶ Dxejc che biejn diajg Jesús nani caniireni, räjpni lo dade'ga:

—Na'c guidxejblu. Bililajztis.

³⁷ Luxh dini nusaanru nij chu ninäni, Pedrtis näj Jacoob näjza Juan bejtzni. ³⁸ Che bidzujñni rolijz dade'ga, bahuii Jesús biejy ni cayujn rebejn ni rbedxa' roon. ³⁹ Biu'tini räjpni:

—¿Xhicuent rujntu si'c? Gajd dxape're guet. Na-gayejssini.

⁴⁰ Alga baxhiznäjrenini. Dxejc gunibee Jesús birii guiraa rebejn̄ga. Dxejcti huinäni xcuzajn dxape'ga con renani sanäni. Biu'reni cadro naga' dxape're.

⁴¹ Gunaazni ñaa dxape'ga, dxejc räjpni:

—Talita cumi —nani säloj con xtiidxnu: Dxape', lojlu rniä, huistie.

⁴² Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn̄ ni bahuii guläs Jesús dxape'ga. ⁴³ Dxejc balijdx Jesús reni te rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

6

Che guyu' Jesús Nazare't

(Mt. 13:53-58; Lc. 4:16-30)

¹ Dxejcru birii Jesús ro'c, huijni lajdxni, sanäzani rexpejn̄pacni. ² Che bidzujñ sabd, dxej nani rusilajz rexpejn̄ Israel, gusloj caguluiini neñ xquidobäz rexpejn̄ Israel. Bidxeloj xhidajl bejn̄ nani biejn diajg rextiidxni, räjpreni:

—¿Caro bisieed niguiire guiraa recosre? ¿Xhi yälñajnre cua'ni ni'c rajc rujñni rextzunduxh Dios

con naani? ³ ¿La xhet laadi carpinteer, xi'n Marii, bejtz Jacobob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. ⁴ Dxejç räjp Jesús lojreni:

—Catis rinälajzreni te ni rnii xtidx Dios. La-jdxtisni, lagajç loj resa'ni, rolijztisni, ro'c rut rinälajzdini.

⁵ Luxh di niajçdi niujn Jesús xhidajl milaagwr ro'c. Tiopchontis benracxhuu basiajçni, bazujni naani yejçreni. ⁶ Bidxelo Jesús sa'csi di lajzreni nilii. Caguluiitini neñ guiraa reguejdxe' ni ria'n gajxh nejzga.

Baxhal Jesús tzubitio'p bejn ni rinajlni chaluireni xtidx Dios

(Mt. 10:5-15; Lc. 9:1-6)

⁷ Dxejçru gurejdxni guitzubitio'p xpejnpacni. Gusloj caguxhalni tiopgajreni; badeedzani yälrnibee lojreni te guinibeereni loj rebendxab.

⁸ Gunibeeni xhet chanädireni lo nejz, ganaxhtis te yajg te sanäjreni. Di nungäjł chanäreni nicla bisiuud, nicla yätxtiil, niclaza meel neñ dobdäjł.

⁹ Nungäjłza xcaj gura'ch ni'reni, nägajç ga'preni tejtis gamangw, xhet tio'pdini. ¹⁰ Dxejçti räjpni lojreni:

—Cadrotis jiu'tu neñ te guejdx, coljia'n neñ tejtis yu' guiraa redxej ni chutu guejdxga. ¹¹ Palga yu' te guejdx cadre direni gusaan jiu'tu luxh di rlajzreni cuadiajçreni diidx ni sanätu, colrii guejdxga, colcuijb guxhuj ni'tu si'c te seen te gacbeereni xhet laadi bejnreni. Rniliäpac lojtu,

guxiiru trabajw ted reben̄ Sodoma näj reben̄ Gommorra quela rebejn̄ ni yu' guejdx cadro direni gusaan jiu'tu.

¹² Dxejc biriireni, sääreni. Cayäbgajczeni nanabpac gusiejch lajz rebejn̄. ¹³ Gulääzarenixhidajl beṅdxab dxejcti gudääbreni se't yejc xhidajl beṅracxhuu, luxh biajcreni.

Xcälgujt Juan ni rutiobnis

(Mt. 14:1-12; Lc. 9:7-9)

¹⁴ Herodes najc nani rnibee dxejc. Biejn diajgni xpala'n Jesús, sa'csi guiralii rebejn̄ calä'p xpala'nni. Dxejc räjp Herodes:

—Juan nani rutiobnis ahuäjs loj rebengut, ni'c rajc rujnni remilagwre.

¹⁵ Sgaii bejn̄ räjp:

—Laa Elías ni gunii xtidx Diosni.

Sgaiireni räjp:

—Laa te bejn̄ ni rnii xtidx Dios, o sa' te rebejn̄ ni gunii xtidx Dios agujc xchero.

¹⁶ Che biejn diajg Herodes si'c, räjpni:

—Laa Juan dee, nani gunibeä biru' yejcn̄i, luxh naj agubansacni loj rebengut.

¹⁷ Sa'csi lagajc Herodes gunibee biga' Juan, dxejc bacuaduurenini con cadenguiib neṅ latzguiib, xcälṅnasa'c Herodías. Herodías gujc chääṅ Lib, bejtz Herodes, dxejc cua' Herodes gunaaga si'c chääṅni.

¹⁸ Räjp Juan loj Herodes:

—Xhet laadi rbäznäjlu chääṅ bejtzlu.

¹⁹ Ni'cni rdxechlajz Herodías loj Juan, luxh rla-jzni ju'tnini, luxh di niajcdini ²⁰ sa'csi rdxejb Herodes Juan, sa'csi najnni beṅsa'c, beṅdxan najc Juan, ni'cni dini nusaan niujn Herodías latsiajni.

Mase dini gacbesa'c ni rnii Juan, rucuardiagsa'cni xtiidxni. ²¹ Niluxh guyu' xmood Herodías. Che gojl laj Herodes, bayaanni rexpejn̄ni ni rnibee, nájza rebejn̄ nani sajc nez región Galilee. ²² Dxejcti biu' xindxa'p Herodías cadre cayajwreni, baya'ni nez lojreni. Bidxaglazduxh Herodes nájza rexp̄i-oozni baya' gunaaga, xindxa'p Herodías. Dxejc räj̄p Herodes lo gunaaga:

—Gunab ni rlaiztisl̄u loä, narä sunidxäni.

²³ Dxejcru räpl̄ii Herodes lojni:

—Sunidxä xhitis ni guiniabl̄u. Mase gala' yuj ni rnibeä.

²⁴ Biriitini neñ̄ yu', huiye'tzni loj xnanni, räj̄pni:

—¿Xhini'c guiniabä lojni?

Dxejc räj̄p xnanni lojni:

—Gunab yejc Juan ni rutiobnis lojni.

²⁵ Huigajcni loj reii, sas gunabni lojni, räj̄pni:

—Rlazä gunidxgajcl̄u loä yejc Juan ni rutiobnis. Neñ̄ te pla't baniidx yejcni.

²⁶ Dxejcti guc-huinduxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäj̄ni lo xmexni, ni'c dipac rlaizni nudxojn̄ni nani gunab gunaaga lojni.

²⁷ Baxhalgajc reii te soldaad ni rcanäj̄ ro'c, baxhaln̄ini, te chaxiini yejc Juan. ²⁸ Ni'c huij, dxejcti bagu'tni Juan neñ̄ latzguiib, biädnätini yejc Juan neñ̄ te pla't. Badeedtinini loj gunaaga. Dxejcti gunaaga badeednini loj xnanni.

²⁹ Che biejn diajg rexpejn̄pac Juan si'c, biädläsreni togoalga. Dxejcti bacua'tzrenini neñ̄ te baa.

Bayaan Jesús gaāi mil bejn
(Mt. 14:13-21; Lc. 9:10-17; Jn. 6:1-14)

³⁰ Che gubi' renani baxhal̄ Jesús, bijreni diidx guiraa ni bejnreni nájza ni baluiireni. ³¹ Dxejc rájp Jesús lojreni:

—Col̄taa, xtebnu choñnu cadre rut rbájzdi, guisilaaznu tudxe'n.

Rájp Jesús si'c sa'csi yu' xhidajl bejn ni sää, ni siääd, nicla gal̄ gauureni. ³² Dxejcti sääreni neñ te canuu cadre rut rbájzdi. ³³ Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujñreni loj Jesús nájza rexpejn̄pacni, dxejcti bidojpreni lojni. ³⁴ Birii Jesús neñ canuu, bahuiini loj beñxhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiinireni guiraloj. ³⁵ Che gojl̄ gudxej, gubig rexpejn̄pacni lojni, rájpreni:

—Rut rbájzdi ree, luxh agudxej ñaj. ³⁶ Baxhal̄ rebejn̄ te cháäreni lo reguejdx, nájza rerench, te chasiireni yätxtiil gauureni sa'csi xheti xhi gauureni ree.

³⁷ Dxejc rájp Jesús lojreni:

—La'tu col̄deed xhi gauureni.

Dxejc rájpreni loj Jesús:

—¿Xhixh sajl tiop gayuu meel yätxtiil chosiinu gauu guiraa rebenxhidajlre?

³⁸ Dxejcti rájp Jesús lojreni:

—¿Bal yätxtiil rajptu? Col̄chahuii.

Che gojnreni balni dxejc rájpreni:

—Gaāi yätxtiil, nájza tiop báj̄l.

³⁹ Dxejcru gunibee Jesús rájpreni loj guiraa rebejn̄:

—Col₁cuej xcua-xcuaatu loj guixhaya'.

⁴⁰ Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni. ⁴¹ Dxejcti cua' Jesús guigaii yätxtiilga näjza guiro'p bäljga, bahuiini xhaguibaa, badeedni xquixhtios loj Dios. Dxejcti gula'ni yätxtiil näjza guiro'p bälj, badeednini loj rexpejn₁pacni te badeedrenini loj guiraa reben₁xhidaalga. ⁴² Dxejc gudajw guiraareni, gudxaj xque'reni. ⁴³ Dxejcru batojpreni tzubitiop dxijm₁ guidxadoo yätxtiil näjza bälj ni bia'n. ⁴⁴ Luxh loj guiraa rebejn₁ ni gudajw yu' si'cti gaii mil niguii.

Guzaj Jesús loj nis

(Mt. 14:22-27; Jn. 6:16-21)

⁴⁵ Gunibee Jesús jiu' rexpejn₁pacni nen₁ canuu, chägajcreni Betsaida, ni tre' dejtz nis stelaad, la₁ni cagusadiidxn₁ni rebejn₁. ⁴⁶ Che gulujx basadiidxnireni, sääni nen₁ redane', sanabni lo Dios. ⁴⁷ Cheni acayu' guxhij₁n, yu' rexpejn₁pacni nen₁ canuu galäi₁ nis la₁ ni suga' Jesús xtebni ro' nis. ⁴⁸ Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rlajzni ninijdni lojreni. ⁴⁹ Dxejc che bahuiireni sasaj Jesús loj nis, naareni pet te ben₁malni, ni'c guredxa'reni. ⁵⁰ Guiraareni bahuiireni lojni, bidxebduxhreni. Sas gunigajcni lojreni, räjpni:

—Col₁sutijp lajztu. Laa naräni. Na'c guidxejbtu.

⁵¹ Dxejcti huä'p Jesús nen₁ canuu cadro yu'reni. Lagajc dxejc biacdxi bej, luxh laareni bidxelo-duxhreni, ⁵² sa'csi direni niacbee xhini'c bennäj

Jesús reyätxtiil. Guc najd lajzreni, ni'c direni ni-acbee.

*Basiajc Jesús rebenracxhuu neñ guedx Genesare't
(Mt. 14:34-36)*

⁵³ Gudejdreni lo nis, bidzujñreni lo yuj xten Genesare't. Ro'c bacuaduureni canuu ro' nis. ⁵⁴ Che biriireni neñ canuu, biembegajc rebejn Jesús, ⁵⁵ dxejcti birii rebejn guideb nejzga. Guslojti siädnäreni benracxhuu loj Jesús, naga' rebenracxhuuga lo da'. Cadrotis riejn diajgreni yu' Jesús riädnäreni rebenracxhuu. ⁵⁶ Niluxh cadrotis rij Jesús, neñ reguedxbäz, neñ reguedxro, näjza loj rerench, rguixhreni rebenracxhuu cadre rajc guii. Dxejcti rniabreni loj Jesús te gac caanreni xhajbni, niluxh biajc guiralii renani gudajn xhajb Jesús.

7

*Nani runijt lastoo bejn
(Mt. 15:1-20)*

¹ Dxejcti refarisee, renani najc benguidoo loj guedx Israel, näjza gaii rebejn ni ruluui leii, renani birii Jerusalén, bidojpreni loj Jesús. ² Bahuiireni cayajw gaii rexpejn_{pac} Jesús, luxh canii rebejn nacdXuudx naareni (dee säloj direni quiib naareni si'ctis ni rdiib naa reben lajdxreni). Ni'cni guniyajreni rexpejn_{pac} Jesús. ³ (Guiraa rebejn xten Israel, näjza refarisee, sasanäj nani baluii rebengool ni yu' guedx Israelreni. Direni gauu palga direni quiib naareni balti huält. ⁴ Che rbi'reni rijreni lo guii, rguibsa'creni naareni, lojreni, ni'reni, dx-ejcti rajc rajwreni. Niluxh guyu' xhidajl costumbr ni sasanäjruren, luxh yu' mood rguiibreni

restrastreni näjza rexplooreni, näjza restrastgui-
ibreni, näjza rexloonreni.) ⁵ Dxejc gunabdiidx re-
farisee näjza rebejn ni ruluii leii loj Jesús, räjpreni:

—¿Xhicuent di rexpejn paclu gun si'cni baluii
rebejn gool, niluxh rajwreni guideb nacdXuudx
naareni?

⁶ Dxejcti gunii Jesús lojreni räjpni:

—¡Bejn guiidx! Laaca gunii Isaías xcuenttu che
guniini xtidx Dios. Scree cajni loj guiitz:

Guejdxre sanälajz narä con rextiidxni,
niluxh lastooreni zitro suga' loä.

⁷ Xlia'si ruzuxhijbreni, sa'csi direni chanälajz narä.
Ruluiireni si'c xtiidxpac Dios nani rnii rebejn.

⁸ Rusa'ntu xleii Dios, sasanädzu'tztu costumbr nani
baluii rebejn gool. Rdibsa'c rexploortu, restrasttu,
luxh rujnzatu xhidajlru cos sa' redee.

⁹ Räjpza Jesús lojreni:

—Rusa'ntu xtidx Dios te risanäjtu recostumbr
xtentu. ¹⁰ Sa'csi räjp Moisés: “Huinälajz xtadlu con
xnanlu.” Räjpzani: “Suju'tpactu nani gudzubde
yejc xtadni o yejc xnanni.” ¹¹ Niluxh la'tu rniitu
sajc gäb bejn loj xtadni o loj xnanni: “Dina gapä
xhi cojn gacnäälü” (nani säloj, abadedä guira'ti loj
Dios). ¹² La'tu ditu gusaan gunru bejn por xtadni
nicla por xnanni. ¹³ Si'c rbälaztu xtidx Dios, te
sasanäjtu recostumbr nani ruluiitu, luxh xhidajl
cos sa' dee rujntu.

¹⁴ Gurejdx Jesús guiraa rebejn, dxejc räjpni loj
guiraareni:

—Colcuadiajg, colyabee xtidxä. ¹⁵ Rexhicos
yälrajw ni rajw bejn, dini gunijt bejnga, rediidx
ni rii nejn lastoo bejn, näjza recos ni rujn bejn,

ni'c runijt bejn̄ga. ¹⁶ Pal yu' chu rlanj guisieed, sucuadiajgni.

¹⁷ Dxejcti gula'reni loj rebeñxhidaal, biu'reni neñ yu'. Dxejc gunabdiidx rexpejn̄pacni loj Jesús xhi säloj cuent ni guniini. ¹⁸ Basejc Jesús diidx lojreni, räjpni:

—¿La näjza la'tu xheti xcäriejntu? ¿La di'tu gacbee xhitis yälrajw nani riu' neñ bejn̄ digacdi gunijtni lastoo bejn̄, ä? ¹⁹ Sa'csi dini jiu' neñ lastooni; riu'ni xque'ni, rdejdtini.

Si'c guniini te baluini guira'ti xhicos najc naya.

²⁰ Dxejc räjpni:

—Rediidx ni rii neñ lastoo bejn̄, näjza recos ni rujn bejn̄, ni'c sii runijt lastoo bejn̄. ²¹ Sa'csi neñ lastoo rebejn̄ rii rexhigabguijdx, näjza yälresnäjä chääl sa'ni, yälresnäjä ni xhet najc di chäälni, yälrugut sa'ni, ²² yälgubaan, yälrlajzni ga'pni xhixhten bejn̄, yällatsiaj, yälrusgueeni, yäl xheti xtujy lojni, yälrdxechlajz, yälrudzubde sa'ni, yälñayechlajzni, yälguyalajz. ²³ Guiraa reyällatsiajre neñ lastoo bejn̄ riireni, luxh reni'csi runijt bejn̄.

*Tej guna Sirofenicia ni bililajz xtidx Jesús
(Mt. 15:21-28)*

²⁴ Dxejc biriini ro'c, sääni nez guedx Tiro näjza nez Sidón. Ro'c bia'nni neñ te yu' sa'csi di rlanjzi niacbee rebejn̄ caro yu'ni, niluxh di niajcdi niuxhiga'tztisni. ²⁵ Biengajc diajg te gunaa ro'c yu' Jesús. Xinxape' gunaaga yu' beñdxab neñ lastooni. Bidzujñ gunaaga, bazuxhijbni lo Jesús. ²⁶ Gunaaga rnii griegw, najcni beñ Sirofenicia. Gunabni lojni guinibeeni guirii beñdxabga neñ lastoo xi'nni. ²⁷ Dxejc räjp Jesús lojni:

—Basaan gauxгаа rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

²⁸ Dxejc gunii gunaaga, räjpni loj Jesús:

—Yo, Dad. Näjza rebäcue' ni suga' neṅ mex rajw nani rtejb ro' rebiuux.

²⁹ Dxejcti räjp Jesús lojni:

—Laaca rniliilu. Huij rolijzlu. Abirii beṅdxab neṅ lastoo xindxape'lu.

³⁰ Luxh che bidzujṅ gunaare rolijzni, a dxape' naga' lo da'. Gucbegajc gunaaga abirii beṅdxab neṅ lastoo dxape'ga.

Basiajc Jesús te beṅgop

³¹ Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujṅtini ro' nis xten Galilee. ³² Biädnä gaii bejṅ te niguii ni nacua't diajgni lo Jesús. Digacdiza guinisa'c niguiiga. Biäd nabreni lo Jesús nusujni ṅaani yejc niguiiga. ³³ Dxejcti badzucajnini loj re-bejṅ. Baquitzgajcni rebicueṅaani neṅ diajgni, dxej-cru batiobxhejnini, gudajṅtini lujdxni. ³⁴ Bahuiini xhaguibaa, bazaa lajzni, dxejc räjpni:

—¡Efata! —nani säloj bixal.

³⁵ Dxejcru bixalgajc rediajgni, gubaṅgajc lujdxni, gunisa'cni. ³⁶ Dxejcti gunibee Jesús rutlojdi gäbreni, per che räjpni lojreni si'c, laareni batie'chrureni diidxga. ³⁷ Rdxeloduxhreni, räjpreni:

—Guira'ti laaca rujnni; ruxhalni diajg redi-agcua't, luxh rusniini regop.

8

Bayaan Jesús tajp mil bejn
(Mt. 15:32-39)

¹ Neñ redxejga bidojp xhidalro bejn, luxh xheti xhigauureni. Dxejc gurejdx Jesús rexpejn_{pacni} ni rinajlni, räjpni lojreni:

² —Rulazlazä rebejn_{re}, sa'csi naj rajc choñ dxej tre'reni loä, luxh xhet yu'di gauureni. ³ Niluxh palga guxhaläreni rolizreni, xliajzreni, sidxaj-greni lo nejz; sa'csi yu' renani zijtru siädreni.

⁴ Dxejcru räjp rexpejn_{pacni} lojni:

—¿Caro chaca'nu yätxtiil te cha xque' rebejn_{re} ree, cadre rut rbäjzdi?

⁵ Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdztsini.

⁶ Gunibee Jesús gurej rebeñxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj rexpejn_{pacni} te guteedrenini loj rebeñxhidaal. Bateedtireni yätxtiilga lo rebeñxhidaalga. ⁷ Rajpzareni gaii bälbáz, dxejcti badesac Jesús xquixhtios lo Dios, gunibeeni bateedzareni rebälbázre loj rebeñxhidaalga. ⁸ Dxejc gudajwreni, gudxaj xque'reni. Dxejc batojp rexpejn_{pac} Jesús gajdz dxijm_{re} reyätxtiil näj rebäj dxuc ni bia'n. ⁹ Niluxh renani gudajwga najcreni si'cti tajp mil bejn. Dxejcti basadiidxnireni. ¹⁰ Biunägajc Jesús rexpejn_{pacni} neñ canuu, biädreni nez Dalmanuta.

Gunab refarisee te senro loj Jesús

(Mt. 16:1-4; Lc. 12:54-56)

¹¹ Biääd refarisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni.

¹² Dxejcti bazaa lajz Jesús neñ lastooni, räjpni:

—¿Xhicuent rlaiz rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

¹³ Dxejcti basa'nnireni ro'c, biusacni neñ canuu, sä'tini stelaad nisga.

Levaduur xten refarisee

(Mt. 16:5-12)

¹⁴ Biallajzreni nica'reni yätxtiil, luxh xhetliidi sanädireni. Tejtis yätxtiil nuureni neñ canuu.

¹⁵ Cagulijdx Jesús rexpejn pacni, räjpni lojreni:

—Col_susin, col_nati levaduur xten refarisee, col_natiza levaduur xten Herodes. (Nalajznu, xtiidxreni najc si'c levaduur.)

¹⁶ Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

¹⁷ Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La la_tis nacnajd lastootu? ¹⁸ ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj?

¹⁹ Che gula'a guigaii yätxtiil te gudajw gaii mil niguii, ¿bal dxijm yätxtiil biujy batojptu?

Sas räjpreni lojni:

—Tzubitio'pni.

20 —Che gula'a guigajdz yätxtiil te gudajw tajp mil bejn, ¿bal dxijm yätxtiil biujy batojptu?

Sas räjpreni:

—Gajdzni.

21 Dxejc räjpni lojreni:

—¿La gajdtu gachesa'c xhi benä?

Basiajc Jesús te lotiä'p Betsaida

22 Bidzunäj Jesús rexpejn_{pacni} guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejn_{ga}. 23 Dxejc gunaazni naa lotiä'pga, guläänini nen_n guejdx. Che batiobxhejn_{ni} nen_n rebaloj_{ni}, basugajc_{ni} naani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

24 Luxh che bahuii bejn_{ga} räjpni:

—Rhuiä sasaj rebejn, luxh si'c yajg rhuiä lojreni.

25 Basusac Jesús naani yejc rebaloj bejn_{ga}. Dxejc bejn Jesús bahuii bejn_{ga}. Biajctini, zijtru gujc bahuisa'cni lo guiraa rebejn. 26 Dxejcti baxhal Jesúsni rolijz_{ni}, räjpni:

—Basquejn, huijga rolijzlu, na'c jiu'lu nen_n guejdx, na'c gäblu xhi gujclu lo rebejn ni yu' nen_n guejdx.

Basule' Pedr Jesús najc Crist

(Mt. 16:13-20; Lc. 9:18-21)

27 Birinäj Jesús rexpejn_{pacni} lo reguejdx ni ria'n nez Cesarea xten Filipo. Lalni sasajreni lo nejz räjp Jesús loj rexpejn_{pacni}:

—¿Chuni'c rnii rebejn nacä narä?

28 Sas räjpreni loj_{ni}:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn ni gunii xtidx Dios.

²⁹ Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

³⁰ Dxejcti räjp Jesús lojreni:

—Rutlojdi gäbtu chu nacä.

Gunii Jesús xho guetni

(Mt. 16:21-28; Lc. 9:22-27)

³¹ Dxejcti gusloj Jesús caguluiini rexpejn_{pacni}, räjpni:

—Narä nacä Xi'n Dios, ni gujc Niguii. Nanab-pac tedä trabajwduxh. Sibälaz rebe_{ngool} ni najc guxhtis ne_{ng} guedx Israel narä, näjza renani rnibee loj rebixhojz, näjza rebejn ni ruluii leii: sugu'treni narä, luxh ni riojn dxej guiba_{nsacä} lo rebe_{ngut}.

³² Guyasi guniini rediidxre. Sas huiinä Pedr Jesús telaad, dxejc räjpni loj Jesús:

—Na'c guiniilu si'c.

³³ Dxejc batzuré loj Jesús, bahuiini loj rex-pejn_{pacni}. Dxejc gudil_{näjni} Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebej_{ntis} rujnlu.

³⁴ Dxejc gurejdxni rebe_{xhidaal} con reni najc xpejn_{pacni}, räjpni lojreni:

—Palga yu' chu rlajz gac xpe_{näpac}, sucuääz gunni ni rsia' lajzni gunni, sutedni trabajw si'c tej ni caj lo cru_{yz}, sujiäd_{najlni} narä. ³⁵ Sa'csi nani rlajz gus_{laa} xcäl_{nabaj_{nni}}, sunij_{t_{ni}} xcäl_{nabaj_{nni}}. Luxh nani runij_t xcäl_{nabaj_{nni}} xcäl_{nasa'c} narä, xcäl_{nasa'c}

xtidxä, siliaapac xcäl̄nabaj̄n̄ni. ³⁶ Xliä' ga'p bejn guiraloj lo guedxliujre palga nitni lo Dios par tejpas. ³⁷ Xhet gacdi gudeed bejn te guiban̄näj̄ni Dios. ³⁸ Nani guituinäj narä con rextidxä naj, cheni najc rebejn bendoj̄l, narä, Xi'n Dios nani gujc Niguui, situinäazani che jiädnaä reangl xten Dios che jiälää lo xcäl̄rdimbicha' Xtadä.

9

¹ Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcäl̄rnibee Dios.

Gubixhlo Jesús garenca

(Mt. 17:1-13; Lc. 9:28-36)

² Che gudejd xho'p dxej, Jesús cua' Pedr, näj Jacoob, näjza Juan, laatisreni huinäni yejc te danro. Ro'c gubixhlojni garenca lojreni. ³ Gusloj rdimbicha' rexhajn̄ni, gujc xhajn̄ni nolbäj. Rut rajcti rusquijtz lajd lo guedxliujre si'c biquijtz xhajn̄ni. ⁴ Dxejc baluiiloj Elías näjza Moisés lojreni, cayuinäjreni Jesús diidx. ⁵ Sas räjp Pedr loj Jesús:

—Dad, laaca dxunnu ree. Naj jiennu chon̄ yuguixa', tejni xtenlu, steeni xten Moisés, steeni xten Elías.

⁶ Si'c guniini sa'csi nicla niacbeeni xhini'c guiniini, sa'csi cadxebduxhreni. ⁷ Dxejc biääd te za bejn balaa yejcreni. Neñ zaga biejn xse' te ni räjp:

—Dee najc xi'nä nani sanälazä, col̄cuadiajg xtiidxni.

⁸ Che batzuré lojreni, bahuiireni rutru suganäjti Jesús, xtebtis Jesús suga'.

⁹ Che siädjiäjtreni dajnga, gunibee Jesús rut lojdi guiniireni xcuent ni bahuiireni, guiban̄xgaasi Xi'n

Dios nani gujc Niguui lo rebengut. ¹⁰ Basälcheereni rediidxre neñ lastooreni. Dxejcro canabdiidx lo sa'reni xhicha säloj guibaṅsacni lo rebengut. ¹¹ Sas gunabdiidxreni lojni, räjpreni:

—¿Xhicuent rñii remastr xten leii naquiinpac jiaäxgaa Elías?

¹² Dxejcti bazejcnii diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijtzc xuent Xi'n Dios ni gujc Niguui, sidejdni trabajwduxh, rutza jiidini? ¹³ Luxh narä rniä lojtu, abiääd Elías, luxh bennäjrenini si'ctis ni rlazreni, si'cpac ni caj loj guijtzc ni rusule' xuentni.

Basiajc Jesús te biuux ni guyu' bendxab neñ lastooni

(Mt. 17:14-21; Lc. 9:37-43)

¹⁴ Che asiäädreni cadro tre' sgaii rexpejnṅpac Jesús, bahuiireni loj xhidalro bejn ni tre' lojreni, luxh cayeinäj rebejn ni ruluii leiireni. ¹⁵ Che bahuii guiraa rebejn loj Jesús, bixeloduxhreni, baxunreni, huiye'tzreni xchan lojni. ¹⁶ Dxejc gunabdiidx Jesús lojreni:

—¿Xhini'c rusieinäjtu laareni?

¹⁷ Sas gunii tej reni yu' lo beñxhidaalga, räjpni:

—Dad, ree siädnaä xi'nä lojlu, yu' bendxab neñ lastooni, nani rujn najcni gop. ¹⁸ Cheni rni-aaznini, rutienta'ni xi'nä, luxh riduxh bitzun ro'ni, näjza rauya'ni ro'ni, luxh cabijdzni. Aräpä loj rexpejnṅpacu cuääreni bendxabga, niluxh di niajcdi nibäärenini.

¹⁹ Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'ä lojtu te chalilajztu? ¿Gucli gusiedtu narä? ¡Coltanäni loä!

²⁰ Dxejc biädnäreni biuuxga lojni. Che bahuii beṇdxab lo Jesús, basnijni bi'nga, basälta'tinini lo yuj. Sädiidxni, luxh carii bitzuṇ ro'ni.

²¹ Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbäz. ²² Balti huält rusälṇini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

²³ Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

²⁴ Guredxa' xtad bi'nga, räjpni:

—¡Rililazä! Gucnäj narä te chaliiru lazä.

²⁵ Che bahuii Jesús bixa't xhidajl bejṇ lojni, gu-didxa'ni lo beṇdxabga räjpni lojni:

—Beṇdxab ni rujn gop, narä canibeä, birii neṇ lastoo bi'nga. Na'cru chulu neṇ lastooni.

²⁶ Dxejcru guredxa' beṇdxabga, luxh basnibzejsni bi'nga, dxejcru biriini neṇ lastooni. Astoo te beṇgut bia'n bi'nga ro'c. Xhidajl rebejṇ räjp:

—Agujtni.

²⁷ Dxejc gunaaz Jesús ṇaa bi'nga guläsnini. Guzuliiti bi'nga. ²⁸ Dxejcti che abiu' Jesús neṇ yu', gunabdiidx rexpejṇpacni lojni:

—¿Xhicuent di niajcdi nibäänu beṇdxabga?

²⁹ Dxejc räjp Jesús lojreni:

—Di gacdi cuäätu sa' beṇdxabre palga ditu cuedx-guinab lo Dios, palga ditu gucuaṇxgaa.

*Gunisac Jesús xho guetni
(Mt. 17:22-23; Lc. 9:43-45)*

³⁰ Dxejc biriireni ro'c, gudejdreni Galilee. Luxh di rlajz Jesús niacbee rebejn sadejdreni nejzga, ³¹ sa'csi caguluiini rexpejn pacni. Cayäjpni lojreni: “Xi'n Dios ni gujc Niguii sidejdni ladz_naa rebejn, niluxh sugu'trenini. Che guiza' cho_n dxej gujtni, sibaj_nni stehuält.” ³² Niluxh laareni direni niacbee xhini'c guniini, bidxej bzareni niniabdiidxreni lojni.

¿Chuni'c saj cru?

(Mt. 18:1-5; Lc. 9:46-48)

³³ Bidzuj_ntireni Capernaum. Che biu'ni ne_n yu' räjpni lojreni:

—¿Xhini'c cagusiejytu lo nejz?

³⁴ Dxejc xhet guniitireni, sa'csi laareni cagusieinäj sa'reni lo nejz don chuni'c saj cru lojreni.

³⁵ Sas gurej Jesús, dxejc gurejdxni guitzubitio'p xpejn pacni, räjpni lojreni:

—Palga yu' chu rlajz gasaj cru lojtu, sugacxgaani si'c te nani xhet sajcti, sugunzani xtzuun chutis.

³⁶ Dxejcti cua'ni tej biuxbäz, huinänini galäiireni. Dxejc gudääzni biuxbäzga, räjpni lojreni:

³⁷ —Chutis ni gacnä_j te rebiuxe're sa'csi rinälajzni narä, sacnä_jni narä, luxh nani gacnä_j narä, xhet narätis gacnäjtini, näjza xtadä nani baxha_l narä racnä_jni.

Nani di guiniyaj nuunu, xladnu yu'ni

(Lc. 9:49-50; Mt. 10:42)

³⁸ Dxejcti gunii Juan räjpni lojni:

—Bahuiinu lo te bejn ni rbää be_ndxab con xcäl_rnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

³⁹ Dxejc räjp Jesús lojni:

—Na'c gudxo_jntu gunni si'c sa'csi bejn nani rujn milagwr con xcäl_rnibee laä digacdi guiniyagajcni narä. ⁴⁰ Nani di guidxagdijl nuunu, xlaadnu yu'ni. ⁴¹ Rniliäpac lojtu, chutis ni guniidx te bas nis lojtu sa'csi najctu xpejn_pac Crist, siguijx Diosni xcuent nani bejn_ni.

Nani rujn jiajb bejn lo dojl

(Mt. 18:6-9; Lc. 17:1-2)

⁴² 'Chutis ni gusiu' tej rebiuxe' ni rililajz narä nen dojl, sugal te guimolin yejn_ni dxejcti gucuaarenini lo nisdoo. ⁴³ Palga tej naalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p naalu gusälreni luj gabijl, loj bajl ni di jiuii, ⁴⁴ cadro diza xpisiujgreni guet, diza bajl jiuii. ⁴⁵ Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadro yu' Dios quela sojb guiro'p ni'lu luxh chääl_u gabijl, lo bajl ni di jiuii, ⁴⁶ cadro di xpisiujgreni guet, diza bajl jiuii. ⁴⁷ Luxh palga tej balojlu gun gunlu dojl, gulääni: hueenru chääl_u cadro rnibee Dios natiä'p lojlu quela sojb guiro'p balojlu chääl_u gabijl, ⁴⁸ cadro di xpisiujgreni guet, diza bajl jiuii.

⁴⁹ 'Si'cni rloj sejd yejc xhi cos yäl_rrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios. ⁵⁰ Hueen najc sejd, luxh palga agudejd yäl_nadzij yejcni, ¿xho guntu te gacsacni nadzij? Col_yajc nadzij la'tu, col_guiba_nnäsa'c sa'tu.

10

Baluu Jesús xcuent rä_rru_ro'n sa'ni

(Mt. 19:1-12; Lc. 16:18)

¹ Dxejcru birii Jesús ro'c huijni nez Judea nájza nez ro' gueu Jordán stelaad. Ro'c bidojp xhidajl bejn lojni stehuält, sas guslosacni caguluinireni si'ctis ni ruluiinireni. ² Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan chäälni, ä?

³ Dxejc laani bazejcní diidx, räjpni lojreni:

—¿Xhini'c gunibee Moisés guntu?

⁴ Dxejcru räjpreni:

—Moisés basaan gudeedni te guitx gusaan chäälni che guro'nnini.

⁵ Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. ⁶ Niluxh che birixtiej beñ guedxliuj, “niguii con gunaa benchee Diosreni.” ⁷ “Ni'cni te niguii siriini loj xtadni, loj xnanni te cuäznäjni chäälni. ⁸ Niluxh renani gujc tiop bejn sajcreni si'c tejsi bejn”, dirureni gac tiop bejn, si'c tejsi bejn gacreni. ⁹ Na'c gudzucaj bejn lo sa bejnni nani abachaag Dios lo sa'ni.

¹⁰ Che biu'reni neñ yu' gunabdidxsac rexpejnpacni lojni xcuent rediidxre. ¹¹ Dxejc räjpni lojreni:

—Chutis niguii ni gusaan chäälni, sas guchnaani ste'cani, rujnni dojl. ¹² Niluxh palga gunaa guro'n chäälni sas guchnaani ste'ca niguii, rujnzani dojl.

*Gunab Jesús gunle' Dios yejc rebiuxbäz
(Mt. 19:13-15; Lc. 18:15-17)*

13 Biädnäza rebejn biuxbäz lojni te gutzuub Jesús naani yejcreni, sas gudidxa' rexpejn pacni lojreni. 14 Che bahuii Jesús xhi cayujn rexpejn pacni, bidxe'chni räjpni lojreni:

—Colsaan jiäd rebiuxbäz loä. Na'c gudxojn-
tureni, sa'csi xcälrnibee Dios najc xten reni najc
nadolajz si'c najc biuxbäz. 15 Rniliäpac lojtu, chutis
ni rlanj jiu' lo xcälrnibee Dios nanab guzobdia-
jgreni xtidx Dios si'c ruzobdiajg rebiuxe' xtidx
xtadreni. Palga dini gun si'c, dini jiu' lo xcälrnibee
Dios.

16 Dxejcti gudäaz Jesús rebiuxbäz, bazujzani
naani yejcreni, gunab Jesús gunle' Dios yejcreni.

*Te bi'n ni rapduxh guninäy Jesús
(Mt. 19:16-30; Lc. 18:18-30)*

17 Che birii Jesús loj xnejzni, ruxun te niguii
biäd lojni, bazuxhijbni. Dxejcti gunabdiidx nigu-
iiga lojni räjpni:

—Dad, beṇsa'c, ¿xhini'c gunä te xca'ä yälṇabajn
par tejpas?

18 Sas räjp Jesús lojni:

—¿Xhicuent rniilu loä beṇsa'c? Tejtisni najc
beṇsa'c; Diostis najc beṇsa'c. 19 Najnlu xhini'c
gunibee Dios gunni: “Na'c guesnäjlū chääl sa'lu,
na'c ju'tlu, na'c cuanlu, na'c gusgueelu chutis,
na'c cuäälū yejc xhixten sa'lu, huinälajz xtdlu,
xnanlu.”

20 Dxejc räjp niguiiga lojni:

—Dad, guiraa redee cayunä cheni gucäli bi'n.

21 Che bahuii Jesús lojni, huinälajznini, räjpni
lojni:

—Tejtis nani cayäädx gunlu. Huij, huito' guiraa
xhixtenlu, badeed xcuentni loj rebejn nani diga'p,

dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

²² Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhix-tenni yu'.

²³ Dxejc bahuii Jesús guideb gabi lojreni, räjpni loj rexpejn_{pacni}:

—Naganduxh jiu' rebejn nani yu'duxh xhix-tenni lo xcäl_{rnibee} Dios.

²⁴ Dxejc bidxelo rexpejn_{pacni} che biejn diajg_{reni} rextiidxni. Dxejc räjp Jesús lojreni stehuält:

—¡Aitu xi'nä!, lacti naganduxh gusaan renani sanälajz xhixtenni guinibee Diosreni. ²⁵ Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

²⁶ Dxejc bidxeloduxh_{reni}, räjp_{reni} lojni:

—¿Chuxhni'c sajc laa lo dojl?

²⁷ Dxejc bahuii Jesús lojreni, räjpni:

—Bejn digacdi gus_{laa} sabejn_{ni}, Diostis rajc rus_{laa} bejn lo dojl, sa'csi Dios rac rujn guira'ti.

²⁸ Sas gusloj Pedr cayäjp lojni:

—Naj nuure ahuilälaznu guira'ti te siopnajl_{nu} luj.

²⁹ Dxejc räjp Jesús:

—Rniliäpac lojtu, chutis nani cuälaz rolijz_{ni}, rebejt_{ni}, rebisiaj_{nni}, xtad_{ni}, xnann_{ni}, chääln_{ni}, rexi'nni, rexyuj_{ni}, xcäl_{nasa}'c narä, näjza xcäl_{nasa}'c xtidx Dios, ³⁰ sica'ni lo guedxliujre te gayuu huält xhidajlru. Sica'ni rolijz_{ni}, rebejt_{ni}, rebisiaj_{nni}, xnann_{ni}, rexi'nni, rexyuj_{ni}. Sisiunajlrenini naj, dxejc xhaguibaa sica'ni yäl_{nabaj}n par tejpas.

³¹ Xhidajl rebejn nani sajc lo guedxliujre xhet

sajcdireni xhaguibaa; niluxh rebejn nani xhet sajcdi lo guedxliujre, xhaguibaaru gasajcreni.

Gunisac Jesús diidx xho guetni

(Mt. 20:17-19; Lc. 18:31-34)

³² Dxejcru sasaj Jesús, nijdni lo rexpejn_{pacni} sääreni Jerusalén, luxh cadxelojreni. Cadxejbza rebejn nani sanajlreni. Dxejcti guläsac Jesús rexpejn_{pacni} lo rebejn, gusloj cayäjpni lojreni guira'ti nani sacni. ³³ Räj_p Jesús:

—Sionnu Jerusalén, luxh narä, Xi'n Dios nani gujc Niguii, sidedä ladz_{naa} rebixhojz nani rnibee näjza rebejn ni rului lei. Luxh sinibeereni guetä. Sutedreni narä lo rebenz_{ij}t nani digac xpejn Israel. ³⁴ Suxhisnäjreni narä, siguijnreni narä, sutio_xhejnzareni loä, dxejcru sugu'treni narä. Che riojn dxej siba_nsacä.

Gunab Jacobo näjza Juan te yäl_nasa'c

(Mt. 20:20-28)

³⁵ Dxejcti gubig Jacobo näjza Juan, rexi'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

³⁶ Dxejc räj_p Jesús lojreni:

—¿Xhini'c rlajztu gunä xcuent la'tu?

³⁷ Räjpreni:

—Cue tejnu cuä'lu ladbee, xteenu cue cuä'lu ladbä_jgw che acanibeelu.

³⁸ Dxejc räj_p Jesús lojreni:

—Ditu gan xhini'c rniabtu. ¿Xhixh saj_c yätu nani yä'ä? ¿Xhixh saj_cza guirobnistu si'cni guirobnisä? Nalajznu, xhixh saj_c tedtu trabajw nani tedä narä.

³⁹ Sas räjpreni lojni:

—Sajc tednuni.

Dxejc räjp Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä. ⁴⁰ Te cue tejtü ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

⁴¹ Luxh che biejn diajg stzuureni bidxe'chreni loj Jacob näjza loj Juan. ⁴² Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxaglajz gasajcrueni lo rebejn. Luxh rebejn ni sajc rnibeduxhreni lo rebejn. ⁴³ Xhet si'c di guntu la'tu. Chutis nani rlanj gasajcru lojtu, riäjĵ gacni mos lojtu. ⁴⁴ Luxh chutis la'tu nani rlanj gasajcru, riäjĵ gacni xmos guiraatu. ⁴⁵ Di Xi'n Dios ni gujc Niguii niäd, te ga'ptisni mos, biädzani te quiixni con xcäl'nabajni te laa xhidajl bejn lo dojl.

Basijc Jesús Bartimeo, ni natiä'p lojni

(Mt. 20:29-34; Lc. 18:35-43)

⁴⁶ Dxejcti biädreni Jericó. Che birii Jesús ro' guedx Jericó con rexpejnpacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn. ⁴⁷ Che biejn diajgni laa Jesús ni siäd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

⁴⁸ Xhidajlreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

⁴⁹ Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

⁵⁰ Sas rołca xhablajzni gudixhni, huisuliini, biäädtni lo Jesús. ⁵¹ Dxejc räjp Jesús lojni:

—Naja', ¿xhini'c rıajzlu gunä?

Dxejc räjp lotiä'pga loj Jesús:

—Dad, rıazä gunlu fiä.

⁵² Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuini. Sanajltini Jesús lo nejz.

11

Biu' Jesús Jerusalén

(Mt. 21:1-11; Lc. 19:28-40; Jn. 12:12-19)

¹ Cheni sadzujñreni gajxh Jerusalén, gudejdreni neñ reguedx Betfagé näjza neñ guedx Betania nez cuä' dajne' ni laa dan Oliib. Baxhał Jesús tiop xpejnıpacni, ² räjpni lojreni:

—Colchäj guedxe' ni ria'n nez lojtu. Che guidzujntu ro' guejdxga, sidxäلتu te bure' ni caduu. Gajd bejnı cuibni. Colxhecnı, coltanägajcni.

³ Palga yu' chu naa lojtu: “¿Xhicuent rujntu si'c?” Colıye'tztis: “Dad caquiinni.” Dxejc suxhalıgajcni bure'ga ree.

⁴ Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhecrenini. ⁵ Gaii bejnı ni tre' ro'c räjp lojreni:

—¿Xhicuent caguxhectuni?

⁶ Dxejc räjpreni loj rebejnıga si'cni räjp Jesús lojreni gäbreni. Basangajc rebejnıga sanäreni bure'ga.

⁷ Dxejcru biädnäreni bure'ga loj Jesús. Badzu-ubreni xhablajzreni dejtz bure'ga. Gubijbti Jesús bure'ga. ⁸ Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

⁹ Rebejn ni nijd lojni näj reni sanajl dejtzni guredxa'reni, räjpreni:

—¡Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni. ¹⁰ Coldeed xquixhtiooz loj Dios sa'csi agubiré xcälrnibee toxtadnu David. ¡Colguiliä'p xpala'n Dios ni yu' jiaro!

¹¹ Dxejcti biu' Jesús nen guedx Jerusalén. Biu'zani nen guidoro. Che bahuii Jesús guira'ti ni cayajc nenga, sanäni guitzubitio'p xpejn'pacni, sääreni Betania sa'csi agudxej.

*Batzubde Jesús yejc te yagiigw ni xhet cajdi lojni
(Mt. 21:18-19)*

¹² Che bara yääl, biunejzreni Betania. Dxejcti gusloj calaan Jesús, ¹³ bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. ¹⁴ Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.
Biejnza diajg rexpejn'pacni.

*Gulää Jesús renani ruto' näj renani rsii nen
guidoo*

(Mt. 21:12-17; Lc. 19:45-48; Jn. 2:13-22)

¹⁵ Dxejcti bidzujn'reni guedx Jerusalén. Biu' Jesús nen guidoro. Gusloj cabääni renani ruto' näj renani rsii nen guidoo. Niluxh batiejxhni rexmex renani ruchaa meel, näjza reyagxhil xten renani

ruto' paloom. ¹⁶ Diruni nusaan nidednäjäreni xhicos nez neṅ guidooga. ¹⁷ Dxejc caguluiinireni, räpgajcni lojreni:

—¿La et screedi caj loj guiitz? “Xyu'ä sirilaj yu' cadre rrinab guiraa rebenguedxliuj lo Dios.” La'tu abejntuni si'c xpiliää gubaan.

¹⁸ Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxeloy rextidx Jesús. ¹⁹ Che biu' guxhijṅ, birii Jesús guejdxga.

Gubijdz yagiigw ni bidzubde

(Mt. 21:20-22)

²⁰ Che bara yääl gudejdreni, bahuiireni agubijdz guideb yagiigw, näj rexlobaani. ²¹ Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcnī, agubijdzni.

²² Dxejcti gunii Jesús räjpni lojni:

—Colchalilajz Dios. ²³ Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. ²⁴ Ni'cni rniä lojtu, xhitis nani guiniabtu lo Dios che rrinäjtuni, colchalilajz xca'tuni, dxejc sica'tuni. ²⁵ Luxh che guiniabtu Dios, palga yu' chu loj rdxechlajztu, colsiäjz lajztu, te näjza Xtadtu nani yu' xhaguibaa gusiäjz lajztu. ²⁶ Palga ditu gusiäjz lajztu con resa'tu, diza Xtadtu nani yu' xhaguibaa gusiäjz lajzni rextojlṅtu.

Yälrnibee xten Jesús

(Mt. 21:23-27; Lc. 20:1-8)

²⁷ Sas bidzunsacreni guedx Jerusalén. Laḷ ni sasaj Jesús neḡ guidoro, rebixhojz nani rnibee, nājza rebejḡ ni ruluii leii, nājza reguxhtis gubig lojni.

²⁸ Rājpreni lojni:

—¿Xhi yälrnibee rajplu, ni'c rujnlu redzuunre?
¿Chu baniidx yälrnibee rujnlu redzuunre?

²⁹ Dxejc rājḡ Jesús lojreni:

—Guiniabdidxäza lojtu. Coḷtzu'ni loä, dxejcti guiniäza xhi yälrnibeere rapä ni'c runä redzuunre.

³⁰ ¿Chu baxhaḷ Juan ni batiobnis? ¿La Dios o la rebejḡ? Colnii loä ḡaj.

³¹ Dxejcti gunii loj sa'reni, rājpreni:

—Palga jie'tznu “Dios”, naani “¿xhicuent ditu nililajz xtiidxni?” ³² Diza niacti niājḡbreni “rebejḡ” sa'csi rdxejḡbreni rebeḡxhidaal, sa'csi guiraa rebejḡ huililajz Juan gujc te bejḡ ni guniipac xtidx Dios.

³³ Dxejcti guniireni, rājpreni loj Jesús:

—Dinu guidon.

Sas rājḡ Jesús lojreni:

—Dizana guiniä xhi yälrnibeere rapä runä redzuunre.

12

Te xcuent rebeḡguijdx ni rbäzlaa

(Mt. 21:33-46; Lc. 20:9-19)

¹ Dxejcti gusloj caguseed Jesús rebejḡ con re-cuent ni ruluii, rājḡpni:

—Yu' te bejḡ bazuj yaguub loj xyujni, bejnzani bazaani, dxejcru gudäänni te lajt cadre jiä't uubga. Dxejcti bejnni te yu' jiaa, te ro'c cue nani ga'p lo xyujni.

'Badedlaatinini loj gaii bejḡ, sä'tini zijt. ² Che bidzujḡ xpäii uub, baxhaḷ baxhuaan uubga te

xmosni loj rebejn ni rbäzlaa ro'c, te xca'ni uub nani riäjĵ xca' bejnĵga. ³ Dxejc rebejn ni rbäzlaa ro'c gunaazreni mosga, gudijnreneni, luxh bazejcrenini siini ganaxni. ⁴ Dxejcru baxhalĵ baxhuaanga stee mos lojreni. Niluxh laareni bacuaareni guijni, gudilguijdxreni yejc mosga, xho rniajni gubi'ni. ⁵ Dxejc baxhalĵ bejnĵga stee mos, dxejc bagu'trenini. Baxhalĵni xhidajlrurenini. Gaii gudilguijdxreni, sgaiini bagu'treni.

⁶ 'Yu'za tejtis xi'nni, luxh sanälajznini. Por lult näjza xi'nni baxhalĵni, naani: "Siucareni xi'nä." ⁷ Dxejc rebejn nani rbäzlaa ro'c räjp loj sa'reni: "Dee najc laa ni jiannäj ree. Colĵtaa, guigu'tnuni, te xca'nu yujre." ⁸ Sas gunaazrenini, bagu'trenini. Guläätirenini lo yujga.

⁹ '¿Xhicha gun baxhuaan yaguubga rebejnre? Siädni luxh sugu'tni rebejnre, dxejcti gudeedni yujga loj ste'ca bejn.

¹⁰ '¿La gajdtu golĵ guijtĵ ni rnii scree? Guij nani guläcaj renani runchee yu', ni'c agujc mastr ni guzuj galoo.

¹¹ Dad xtennu bejn scree, cos sacduxhni nezlojnu.

¹² Dxejc rlajz reguxhtis nani bacuadiajg cuentre niniaaz Jesús, sa'csi gucbeereni laareni cacuaa Jesús diidxre. Sa'csi bidxejbreni rebenxhidaal, ni'c basa'nrenini, sä'tireni.

Diidx xcuent reimpuet

(Mt. 22:15-22; Lc. 20:20-26)

¹³ Dxejcti baxhalĵreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús. ¹⁴ Dxejcti biädreni, räjpreni lojni:

—Dad, nadonnu luj najclu te bejn ni rnili. Par luj guiraasi bejn sajc tebloj, sa'csi dilu fii la sajc bejn o la xhet sajcđi bejn. Luj ruluiipaclu xhini'c rlajz Dios gun bejn. ¿La laaca quiix bejn reimpuest lo xcubieer César o la xhet laadi? ¿La guidiixnu o la dinu guidiix?

¹⁵ Dxejcti laani gucbegajcni rujnsireni si'cni rni-abdiidxreni. Räjpnı lojreni:

—¿Xhicuent runnäjtı narä scree? Cołtanä te meelga loä, te fiä lojni.

¹⁶ Badeedtireni te meel lojni, dxejc räjpnı lojreni:

—¿Chu yejc caj lojni, chu laj caj lojni?

Dxejc räjpnı:

—Xten César.

¹⁷ Dxejc räjpnı Jesús lojreni:

—Cołdeed nani najc xten César loj César; cołdeedza nani najc xten Dios loj Dios.

Baschelojni rebejnğa con xtiidxni.

*Yälrniabdiidx xcuent yälrbansacni lo rebenğut
(Mt. 22:23-33; Lc. 20:27-40)*

¹⁸ Sas biädhuii resaducee loj Jesús. Resaducee najc rebejn nani rnii di rebenğut guibansac. Dxejc gunabdiidxreni lojni, räjpnı:

¹⁹ —Dad, xleii Moisés ruluii loonu, palga guet te niguii luxh gusa'nni chäälni ruti xi'nni, nanabpac xca' bejtzni chäälni, te chu xi'nni con laani lacua niu' xi'n tobejtzni. ²⁰ Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni. ²¹ Dxejcti cua' ni rojpnı gunaaga. Che gujtni, rut gajcđi xi'nni. Si'cza gusajc ni ri-ojnğa. ²² Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtzta

gunaaga. ²³ Guigajdzreni guläznäjreni gunaare. Cheni guibaṅsacreni lo rebēṅgut, ¿chu chääł gacni?

²⁴ Dxejc bazejc Jesús diidx lojreni, räjṗni:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijtz, dizatu gumbēe yälṛnibee xten Dios. ²⁵ Che guibaṅsacreni loj rebēṅgut, direni guchṅaa, rutza gudeedtireni te guchṅaareni. Niluxh sajcreni si'c najc rexangl Dios nani yu' xhaguibaa. ²⁶ Palga canabdiidxtu la rbaṅsac rebēṅgut, ¿la di lajztu guisaj biłtu guijtz ni bacuaa Moisés? Moisés bacuaa nani gunii Dios lojni nen bajl, räjṗni: “Narä nacä Xtios Abraham, Xtios Isaac, Xtios Jacob.” ²⁷ Palga Dios najc Xtios rebejnre, direni gac bēṅgut, nabaṅnäjreni Dios. Et laadi najc xhigabtu.

Yälṛnibee ni sajcru
(Mt. 22:34-40)

²⁸ Dxejcru bidzujṅ tej rebejn ni najn leii, biejn diajgni xhi caniireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcru lo guiraareni?

²⁹ Dxejc räjṗ Jesús lojni:

—Mandamient nani sajcru loj guiraareni najc dee: “Bacuadiajg luj, guejdx xten Israel, Dad Xtiosnu, Dad tejtis najcni. ³⁰ Chanälajzlu Dad Xtioslu guideb lastoolu, nāj xaimlu, nāj guideb xcäriejnlu, nājza guideb xcälṅnadiplajzlu.” ³¹ Sigajcza najc mandamient ni rojṗga: “Huinälajz sabejnlu si'ctis sanälajzlu lagajc luj.” Redee najc remandamient nani sajcru loj guiraareni.

³² Dxejcti räjṗ bejnṅa ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani. ³³ Luxh sacduxh chanälajz bejn Dios guideb lastooni, näj xcäriejnni, näjza xaimni, näj guideb xcäl'nadiplajzni, luxh chanälajzni resabejnni sigajc laani. Redee sajcro loj ni rujn bejn che rudeedreni gojn lo Dios.

³⁴ Che bahuii Jesús laaca guniini, räjpni lojni:

—Guxii cayäädx te jiu'lu loj xcäl'rnibee Dios.

Sas rutru biajxhdi gunabdiidx loj Jesús.

Chu xi'n najc Crist

(Mt. 22:41-46; Lc. 20:41-44)

³⁵ Che caguseed Jesús neñ guidoro, räjpni:

—¿Xho mood rnii rebejn ni najn leii Crist najc xi'n David? ³⁶ Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

³⁷ Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebeñxhidaal nani yu' guejdxga bacuadi-agsa'creni xtiidxni.

Gule'c Jesús xquej remastr xten leii

(Mt. 23:1-36; Lc. 11:37-54; 20:45-47)

³⁸ Lałni caguseedni rebejn, räjpni lojreni:

—Col̄susin, na'c gu'chtu loj rebejn ni ruluii leii. Laareni rlajz sanäj reladsiool xtenreni. Rdxaglajzreni rnii bejn lojreni nez lo reguii.

³⁹ Rlajzarenı cuerenı cadro rbej renani sajcro neñ reguidoo näjza cadro ru' relanij.

⁴⁰ Rudzucajzarenı xhixten rebiuud, rniizarenı

xhidalduxh diidx che ro_lreni le', te rusäuureni loj rebejn. Castigwroru gac redee.

Gojn xten te biud prob

(Lc. 21:1-4)

⁴¹ Dxejcti gurej Jesús cuä' caj cadro rusäl bejn gojn. Cahuini cagusäl rebejn meel neñ cajga. Xhidajl reni rajp cagusäl xhidajl meel nenga. ⁴² Che biäd te biud prob, basälni tiop melbäz ni sajc si'cti tej centaab. ⁴³ Dxejcru gurejdx Jesús rexpejn_{pacni}, räjpni lojreni:

—Rniliäpac lojtu, biud proobre basäl xhidajlru lo guiraa renani basäl neñ cajre, ⁴⁴ sa'csi guiraareni abasäl che'nsi xhixtenreni. Luxh gu-naare basäl guiraa nani rajpni. Ni'ctis najc nani gaunäjni.

13

Gunii Jesús sibijl guidoo

(Mt. 24:1-2; Lc. 21:5-6)

¹ Cheni sariireni neñ guidoro, räjp tej rexpejn_{pacni} lojni:

—Dad, bahuui lacti reguij, lacti reyu'.

² Dxejcti räjp Jesús lojni:

—¿La rhuilu loj reyu're? Nicla tej guij dijia'n dzuub yejc sa'ni, guiraliireni sire'ch.

Recos ni gac che ameer nitloj guedxliuj

(Mt. 24:3-28; Lc. 21:7-24; 17:22-24)

³ Dxejc sobga' Jesús yejc dajne' ni laa dan Oliib, cahuini nez ro' guidooga. Che sugaxhtebreni, gunabdiidx Pedr näj Jacobb näjza Juan näjza Andrés lojni, räjpreni:

4 —Gunii loonu, ¿guc gac dee? ¿Xhi guihuiinu te gacheenu asiáddzũngajxh soob guiraa rediidxre?

5 Dxejcti gusloj gunii Jesús lojreni, rájpnì:

—Colhuii, te rut gusgueedi la'tu, 6 sa'csi xhidalduxh bejn̄ jiáäd con laä, gäbreni: “Narä nacä Crist”, luxh rniisireni si'c, susguezareni xhidajl bejn̄.

7 'Che jiejn diajgtu yu' guer̄ näj yäl̄nadxeb xten guer̄, na'c guidxejbtu. Nanabpac gacni; et dxejcdi nitloj guedxliuj. 8 Säjs naciõn̄ yejc sanacion̄ni, näj yäl̄rnibee yejc sayäl̄rnibeeni. Xhidajl lajt sajc xu, siliaanza bejn̄, luxh säjs rebejn̄ yejc sa'ni. Redee najc ni guisloj guidxejb, gachuinza lajzni.

9 'Dxejc la'tu col̄susin̄ sa'csi suteedreni la'tu ladzn̄aa reguxhtis, siguijnzareni la'tu nen̄ reguidoo. Sacrejdxtu lo regubieer näjza loj rereii xcäl̄nasa'c narä, te si'c gac guiniitu xtidxä lojreni.

10 Nanabpac guirechxgaa xtidx Dios loj guiraa reben̄ guedxliuj. 11 Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Col̄nii nani jiäjtis yejcti dxejc, sa'csi xhet la'ditu ni guinii, Sprit Dxañ xten Dios ni guinii. 12 Luxh suto' bejn̄ lagajc bejtzni te guet bejtzni. Suto'za dad lagajc xi'nni. Säjs rebiuux yejc rexcusajnni te guet reguzajnga.

13 Sidxechlajz guiraa rebejn̄ lojtu sa'csi najctu xpenä; nani ted guiraa retrabajwre, ni'c gudeed Dios xcäl̄nabajnni.

14 'Che fiitu loj nani najc yäl̄rdxechlajz, nani najc yäl̄runitloj, nani gunii Daniel ni gunii xtidx Dios. Che fiitu nani suga' cadro di nunyäj̄l suuni, dxejcti suguxun̄ renani yu' nez Judea chääreni nez nen̄ redajn̄. (Nani gol̄ guijtzre sugacheenini.) 15 Bejn̄

nani suga' yejc yu' na'c jiajtni jiu'ni nen te yu' xca'ni gaa' xhixtenni. ¹⁶ Nani yu' loj niaa, di gal jiajt te xca'ni xhablajzni. ¹⁷ ;Aii! Xhiza nalas chu regunaa ni nuu baa, luxh renani rusia' xi'nni, nen redxejga. ¹⁸ Colnab loj Dios na'c sactu scree nen rebainajl. ¹⁹ Nen redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. ²⁰ Paru di Dad gusia'tz redxejga, nicla tej bejn di laa. Susia'tzni redxejga sa'csi sanalajzni rexpejni nani aguleni.

²¹ 'Dxejc palga yu' chu naa lojtu: "Colhuii, aree Crist", o "Colhuiire, ani suga' rec", na'c chalilajztuni. ²² Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueereni, te palga sajcn, rlanjreni gusgueelireni renani agule Dios. ²³ Ni'cni la'tu colsusin; agunixgaä lojtu guira'ti ni gac.

*Xho gac che jiaad Xi'n Dios ni gujc Niguii
(Mt. 24:29-35, 42-44; Lc. 21:25-36)*

²⁴ 'Nen redxejga, cheni luux retrabajwduxhga, sicäy lo gubijdx, luxh diru baai gusanij. ²⁵ Sitejb rebalxhaguibaa, sinibsejs recos nani nasnaj rebalxhaguibaa. ²⁶ Dxejcti suhuii rebejn loä, Xi'n Dios nani gujc Niguii, siälä nen reza guideb yalrnibeduxh xtenä, najza xcaldimbicha'ä. ²⁷ Dxejcti guxhalgacä rexanglä jiadtojpreni renani guleä guideb lo guedxliuj, cat nalooli guedxliuj najza cadre nalooli guibaa.

²⁸ 'Colguiseed nani ruluii yagiigw. Cheni rii rebäte' lojni luxh che rcaj balajg lojni, acaxhna-jntu baai gusguj asadzungajxh. ²⁹ Sigajcza, che fiitu acayajc recosre, sacheetu asiädgaxhä, ameer

guidzunä. ³⁰ Rniliäpac lojtu, rebejn ni nabajn dx-
ejc, direni nitloj, fixgaareni gac recosga. ³¹ Sinitloj
guibaa näjza guedxliuj, rextidxä di nitloj.

³² 'Naj, rut najndi gac gac recosga, nicla rexangl
Dios ni yu' xhaguibaa, niclaza narä Xi'n Dios,
Xtadätis najn.

³³ 'Colhuii, col̄susin, col̄nab loj Dios, sa'csi ditu
gan gac guidzujn redxejga. ³⁴ Dee najc si'c najc te
bejn ni birii sää zijt. Che gajdlini guirii, badeedni
xtzun rexmosni, luxh gunibeezani susin nani
canäj rolä'. ³⁵ Si'cza col̄susin, sa'csi ditu gan gac
jiääd baxhuaan yu'ga, la jiäädni gudxej, o la jiäädni
garol yääl, o la cäy, o la jiäädni rsil. ³⁶ Col̄susin, te
di guiga'tu nagayejstu che guidzujni. ³⁷ Rediidx
nani rniä lojtu, loj guiraa rebejn rniäni: col̄susin.

14

Ruchaagreni diidx te guiniaazreni Jesús

(Mt. 26:1-5; Lc. 22:1-2; Jn. 11:45-53)

¹ Riäädx tiop dxej guidzujn lanij, dxej ni ruzaa
lajzreni gulaareni ladznaa reEgipto. Nen redxe-
jga rajwreni yätxtiil nani di saguij. Rebixhojz
nani rnibee nen guidoo xten rexpejn Israel näj
rebejn ni ruluii leii rlajzreni niniaazreni Jesús con
yälrusguee, te nugu'trenini. ² Dxejcti räjpreni lo
sa'reni:

—Na'c jiennu scree nen redxelanij, te na'c gun
ben̄guejdx biey.

Te gunaa ni basäl se't yejc Jesús Betania

(Mt. 26:6-13; Jn. 12:1-8)

³ Yu' Jesús Betania, rolijz Simón, nani guyu'
guejch ni ral̄ tiejxhni. Che sobga'ni lo mex,

biääd te gunaa ca' te bo'tguij yu' setnard nenni. Rlianexhduxhni, sacduxhni. Dxejc gudi'chni yejn bo'tguijga, te basälni se'tga yejc Jesús. ⁴ Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga? ⁵ Paru nido' se'tga, nijni si'cti chon gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

⁶ Dxejc räjp Jesús lojreni:

—Colsaanni, ¿xhicuent rudxojuantu nani cayujn gunaare? Cos sacduxh dee bennäjni narä. ⁷ Guideb ni guibajntu, su' rebejn nani xhet rajpdi lojtu, luxh che rlanjtu sajc gacnäjtireni. Narä et xchejdi chu'ä lojtu. ⁸ Gunaare abejnni nani gujctis bejni. Abaslanexhxgaani tiexhä, te chää tiexhä nen baa. ⁹ Rniliäpac lojtu, cadrotis guidzujn xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

Rlajz Judas guto' Jesús

(Mt. 26:14-16; Lc. 22:3-6)

¹⁰ Dxejcti huij Judas Iscariot, nani najc tej retzubitio'p xpejn pac Jesús, loj rebixhojz nani rnibee te guto'ni Jesús lojreni. ¹¹ Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguuil Judas xho guto'ni Jesús.

Gudauxchej Dad con rexpejn pacni

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladznaa reEgipto. Räjp rexpejn pacni loj Jesús:

—¿Caro rlanjzlu chosucheenu te gauulu nadxej, dxelanij?

¹³ Dxejc baxhalni tiop rexpejn_{pacni}, räjpni lojreni:

—Colchäj nen_{guejdx}, ro'c guidxaagtu te niguii ni nuu te re' nis. Colchanajl niguiiga. ¹⁴ Cadro jiu'ni colye'tz loj bejn ni najc rolijzni ro'c: “Naj Dad mastr, ¿con yu' cadro ria'n rebiooz, cadro gaunäjni rexpejn_{pacni} nadxej, dxelanij?” ¹⁵ Dxejcti guluiini lojtu te yu' ni sojb jiaaliga yejc sa'ni, ni asuchexgaa nenni. Colyujn xhi guidaunu ro'c.

¹⁶ Sas huij rexpejn_{pacni}, bidzujn_{reni} nen_{guejdxga}. Bidxälreni te yu' si'cni räjp Jesús lojreni. Ro'c bejnreni xhi gudajwreni dxelanij.

¹⁷ Che huääz gubijdx, bidzunnäj Jesús guitzubitio'p xpejn_{pacni}. ¹⁸ Lalni sobga'reni lo mex caya_{jwreni}, räjp Jesús lojreni:

—Rniliäpac lojtu, tej la'tu ni cayaunää, suto'ni narä.

¹⁹ Dxejcti gusloj cayac-huin lajzreni, räjp tebgajreni lo Jesús:

—¿La naräni?

Räpgajc steeni:

—¿La naräni?

²⁰ Dxejcti guniini, räjpni lojreni:

—La tej retzubitio'p, tej ni cayajw loj xpla'tä.

²¹ Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

²² Lalni cayajwreni, cua' Jesús yätxtiil, badeedzani xquixhtiooz loj Dios dxejc gula'nini, badeednini lojreni. Dxejcti räjpni:

—Colca' yätxtiilre. Dee najc si'c tiexhä.

²³ Cuagajcni te bas. Che abadeedni xquixhtiooz loj Dios, badeednini lojreni, gu' guiraareni nen basga. ²⁴ Dxejcti räjp Jesús lojreni:

—Dee najc si'c xtienä ni ruluu diidx ni biä'nnu, nani guixe' xcuent xhidajl rebejn. ²⁵ Rniliäpac lojtu, diruna yä'ä bin nani ri'ie yejc uub, dxejli yä'äni stehuält loj xcälrnibee Dios.

Gunii Jesús sinii Pedr dini gumbeeni

(Mt. 26:30-35; Lc. 22:31-34; Jn. 13:36-38)

²⁶ Che gulujx bilreni te dij xten Dios, biriireni, sääreni nez dajne' ni laa dan Olib. ²⁷ Dxejcru räjp Jesús lojreni:

—Guiraatu sibälaztu narä naguxhijn, sa'csi si'c cajni lo guijt: “Sugu'tä baxhtoor luxh suxun rexiiil.” ²⁸ Che guibañsacä loj rebengut, ganidä cha'a Galilee, dxejcti jiäädte.

²⁹ Dxejc räjp Pedr loj Jesús:

—Palga guiraareni cuälazlu, narä dina cuälazälu.

³⁰ Dxejc räjp Jesús lojni:

—Rniliäpac lojlu, lagajc guxhijnre, nicla gajd guidgäi cuedxa' tiop huält, luj aguiniilu chon huält dilu gumbee narä.

³¹ Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejn pacni gunii si'c.

Gunab Jesús loj Dios che yu'ni Getsemani

(Mt. 26:36-46; Lc. 22:39-46)

³² Dxejcti bidzujnreni te lajt cadro laa Getsemani. Dxejc räjpni loj rexpejn pacni:

—Colcuej ree lalni chanabä lo Dios.

³³ Dxejcru sanäni Pedr näj Jacoob näjza Juan. Dxejc gusloj cayac-huinduxh lajzni, luxh cayu'ni yälrsiaduxh. ³⁴ Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

³⁵ Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc. ³⁶ Räjpni:

—Abba, xtadä, luj rajc rujnlu guira'ti: badzucaj retrabajwre loä. Xhet si'cni rlazädi narä, bejn si'cni rlazlu luj.

³⁷ Dxejc biädäni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' dini-ajcni nutie'chlu bacal? ³⁸ Coltie'ch bacal, colnab lo Dios, te na'c guntu dojl. Lastootu rlazj gutie'chtu bacal, luxh tiejxhtu abadxajg.

³⁹ Huij Jesús stehuält, binabni loj Dios, guniini lagajc rediidx ni guniini galoo. ⁴⁰ Dxejcti biädsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. ⁴¹ Ni riojn huält biädäni, dxejc räjpni lojreni:

—Agojl colguejs, colsilajz, agujc, abidzujn or ni ted Xi'n Dios ni gujc Niguii ladznaa rebendojl. ⁴² Colchastie, colcho'. Asiäddzungajxh ni guto' narä.

Gunaazreni Jesús

(Mt. 26:47-56; Lc. 22:47-53; Jn. 18:2-11)

⁴³ Canisijcni scree, che bidzujn Judas, ni najc te retzubitio'p xpejnpacni, siädänäni xhidajl bejn. Ca'reni spaad, ca'reni yajg biriireni lo rebixhojz

nani rnibee, näjza rebejn ni ruluii leii, näjza rebeḅgool nani najc guxhtis. ⁴⁴ Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

⁴⁵ Che bidzujn Judas, gubigni loj Jesús, räjpni lojni:

—Dad, Dad.

Sas bachagro'nini. ⁴⁶ Dxejcru gunaazreni Jesús ro'c.

⁴⁷ Dxejc tej reni suga' ro'c, gulää xspaadni, gudilguijdxni xmos bixhojz nani sajcru, batiu'ni diajgni. ⁴⁸ Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan? ⁴⁹ Guiraa dxej guyu'ä lojtu neḅguidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

⁵⁰ Dxejcru rexpejnpacni gulälazrenini, baxun̄tireni.

Bi'n nani baxun̄

⁵¹ Sanajlza te bi'n Jesús, nadejbni ganaxhtis te bariaad. Si'c gunaazrenini. ⁵² Dxejcti baxun̄ni, libasa'n̄ni bariaadga, sä'tini xhabäälni.

Suga' Jesús loj reguxhtis

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Dxejc biädnäreni Jesús loj bixhojz ni sajcru. Bidojp rebixhojz nani rnibee, näj rebeḅgool ni najc guxhtis, näjza rebejn ni ruluii leii. ⁵⁴ Luxh Pedr zijt zijt sanajlni Jesús. Che bidzujntini lo xle' bixhojz

ni saj cru, gurenäjni rebejn nani rajp ro'c, cagucha' lajzni lo bajl.

⁵⁵ Rebixhojz nani rnibee, näjza guiraa rebengool ni najc guxhtis, caguilreni xhi tej xquej Jesús nidxälreni, te nugu'treni Jesús, xhet bidxäldireni.

⁵⁶ Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni. ⁵⁷ Dxejc huisulii gaii bejn ni guniireni stee didxxhii xcuent Jesús, räjpreni:

⁵⁸ —Nuunu biejn diaagnu guniini: “Sutiexhä xyu' Dios ni guc-chee con naa rebejn, luxh chontis dxej guncheä steeni, ni nac-chee et con naadi rebejn.”

⁵⁹ Nicla si'c di xtiidxreni nile', sa'csi garen garenza guniireni.

⁶⁰ Dxejcti huisulii bixhojz ni saj cru galäi guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

⁶¹ Laani niä uutis ro'ni, xhet guniidini. Dxejcti gunabdidxsac bixhojz ni saj cru lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

⁶² Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza nen reza ni tre' xhaguibaa.

⁶³ Dxej cru bixhojz ni saj cruga, batiäjsni tla' xhajibni, räjpni:

—¿Xhi jienrunu guidiilnu diidx xcuentni?

⁶⁴ Abiejn diajgtu xho guniyajni Dios. Naja', ¿xhi najtu?

Dxejcti guiraareni räjp nungäjlpac guetni.

⁶⁵ Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

Gunii Pedr dini gumbee Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Dxejc suga' Pedr lo yuj, nez lo le'ga, che biääd te xcriaad bixhojz ni saj cru. ⁶⁷ Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siääd Nazare't.

⁶⁸ Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaii. ⁶⁹ Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

⁷⁰ Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi ben Galileelu, luxh guyasi riejn rniilu si'c rnii reben Galilee.

⁷¹ Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

⁷² Dxejcti barojp huält guredxa' guidgaii. Dxejc banalajz Pedr nani räjp Jesús lojni: “Che gajdli guidgaii cuedxa' tiop huält, luj gacla choñ huält aräjplu dilu gumbee narä.”

Dxejc guslojni cayoorni.

15

Suga' Jesús loj Pila't

(Mt. 27:1-2, 11-14; Lc. 23:1-5; Jn. 18:28-38)

¹ Che bara yääl bidxaag sa' rebixhojz ni rnibee, näj rebeᅅgool ni najc guxhtis, näjza rebejᅅn ni ru-luii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't. ² Dxejc gunabdiidx Pila't loj Jesús räjpni:

—¿La luj ni najc reii xten rexpejᅅn Israel, ä?

Räjp Jesús lojni:

—Si'cni guniilu, si'c najcni.

³ Dxejc gusloj rebixhojz nani rnibee cabe'c rexquej Jesús. ⁴ Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

⁵ Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25; Jn. 18:38-19:16)

⁶ Dxelanijpac ruslaa Pila't tej rebejᅅn ni yu' latzguiib. Ruslaani chutis te ni rniab rebejᅅn. ⁷ Lo rebejᅅn ni yu' latzguiib nadxaag te niguii ni laa Barrabás. Bagu'tni te bejᅅn che nu'chni lo te cuaa bejᅅn ni gudilnäj gubieer. ⁸ Dxejc bidojp xhidajl bejᅅn loj Pila't, gunabreni lojni gunni si'ttis ru-jnni casob lanij. ⁹ Dxejc gunabdiidx Pila't lojreni, räjpni:

—¿La rlanjtu guslaä reii xten rexpejᅅn Israel, ä?

¹⁰ Sa'csi gucbegajcni rdxechlajz rebixhojz loj Jesús, ni'c bateedrenini lojni. ¹¹ Ni'cni baquiilza rebixhojz ni rnibee rebeᅅxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

¹² Dxejc räjp Pila't lojreni stehuält:

—¿Xhini'c rlanjtu gunnäã nani rniitu reii xten rexpejn Israel?

¹³ Dxejcru guredxa'reni:

—¡Bacuaani lo cruju!

¹⁴ Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¡Bacuaani lo cruju!

¹⁵ Baslaati Pila't Barrabás, sa'csi rlanjni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruju.

¹⁶ Dxejc huinä rexsoldaadni Jesús neñ Pretoor, yu' cadro rujnreni yälguxhtis, ro'c batojpreni guiraa resa'reni. ¹⁷ Dxejcti bashuajcwreni Jesús te lad moraad, bencheereni te coron guejch basälreni yejcní. ¹⁸ Guslogajc caguxhi näjrenini, caniireni lojni:

—¡Colguiliä'p xpala'n reii xten rexpejn Israel!

¹⁹ Batiäjlneni te yabixhijl yejcní, batiobxhejnreni lojni, luxh guzuxhijbreni te rajnrenini. ²⁰ Che gulujx basacsíreni Jesús, gulääreni lad moraad ni najcwni, sas bashuajcwrenini xhajbpacni. Gulägajceni Jesús te cuaarenini lo cruju.

Bacuaareni Jesús loj cruju

(Mt. 27:32-44; Lc. 23:26-43; Jn. 19:17-27)

²¹ Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basguurenini xcruju Jesús.

²² Dxejcti huinäreni Jesús cadro laa Gólgota, nani säloj: dan Calabeer. ²³ Ro'c badeedreni lo Jesús bin nani nu'ch mir lojni, dxejc laani naaddini niä'ni binga. ²⁴ Che gulujxti bacuaareni Jesús loj cruzj, gudzujtreni yejc rexbajbni, te don xhini'c xca' tejpgareni.

²⁵ Agujc choṇ or gulejn gubijdx che bacuaareni Jesús lo cruzj. ²⁶ Letreer cadro bacuaareni xtojṇni scree bejnrenini: “Reii xten rexpejn Israel.” ²⁷ Bacuaazareni lo stiop cruzj tiop gubaan, tejni xladbee Jesús, xtee xladbäjgwni. ²⁸ Dxejc guzobj diidx ni caj loj guiitz nani rnii: “Loj rebenguijdx bigabni.”

²⁹ Luxh renani sadejd nejzga guniyajreni Jesús, cagusniibreni yejcreni, räjpreni lojni:

— ¡Jaa! Luj nutiejxhlu guidoo luxh choṇtis dxej niunchesacluni. ³⁰ Naj baslaa lagajc luj, biäjt loj cruzjga.

³¹ Näjza rebixhojz ni rnibee, näj rebejn ni ruluii leii, baxhiznärenini, räjp loj sa'reni:

— Ste'ca bejn ruslaani, xhoxh digacdi guslaani lagajc laani. ³² Naj sujiäjt Cristre, reii xten rexpejn Israel, lo cruzj te guihuünu, te chalilaaznu.

Näj regubaan ni caj lo cruzj guniyajzareni Jesús.

Xcälgujt Jesús

(Mt. 27:45-56; Lc. 23:44-49; Jn. 19:28-30)

³³ Che gojṇ läidxej, bicäy si'cti choṇ or. ³⁴ Che gudejd choṇ orga, guredxa' Jesús dipro, räjpni con xtiidxni:

— Eloi, Eloi, ¿lama sabactani? — dee säloj: Xtiozä, Xtiozä, ¿xhicuent gulälazlu narä?

³⁵ Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

³⁶ Sas baxun tejni, bahuajdxni te sponj loj binagr. Dxej cru basälhini yejc te yabixhijl, badeed-nini loj Jesús te yänini, räbgajcni:

—Colgusaan guihuiinu don la siädläjd Elíasni loj cruuz.

³⁷ Dxej cru guredxaduxh Jesús, gujttini. ³⁸ Dxejc lajd ni najl neñ guidoro biräjsni, gujcn tiop la', jiaali lo yujli. ³⁹ Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

⁴⁰ Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. ⁴¹ Che guyu' Jesús Galilee birinajl regunaare Jesús, luxh bahui-irenini. Yu'za xhidajlru regunaa ni biädnejl Jesús che biädni Jerusalén.

Biga'tz Jesús

(Mt. 27:57-61; Lc. 23:50-56; Jn. 19:38-42)

⁴² Biu' gudxhijñ, luxh najcni dxe bispr che rusucheereni par sabd, dxej ni rusilajz rexpejn Israel. ⁴³ Biäd José ni siäd Arimatea, najcni te rebejn ni saj loj reguxhtis. Näjza laani cabäjzni xcälrnibee Dios. Guideb yäl nabajñ gunabni tiexh Jesús lo Pila't. ⁴⁴ Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús. ⁴⁵ Che räjp capitánga lojni agujt Jesús, dxejc badeed Pila't tiexh Jesús loj José. ⁴⁶ Agusii José te bariaad,

luxh che gulätni Jesús lo cruzj, batejbnini nen bariaadga. Dxejc gudixhni Jesús nen te biliää ni caj cuä' te guilaj, dxejcru batzugni te guiro ro' biliääga. ⁴⁷ Bahuii Marii Magdalen näj Marii xnan José cadro biga'tz Jesús.

16

Huäjz Jesús loj rebengut

(Mt. 28:1-10; Lc. 24:1-12; Jn. 20:1-10)

¹ Che gudejd sabd, dxej ni rusilajz rexpejn Israael, Marii Magdalen näj Marii xnan Jacoob näjza Salomee gusii setnejxh te chatääbreni se'tga tiexh Jesús. ² Che biu' xmaan, rsildooru, che calejn gubijdx, biäädreni ro' xpaani. ³ Cayäjp loj sa'reni:

—¿Chu gudzucaj guiroga ro' xpaani te jiu'nu?

⁴ Che gudixhlojreni, bahuiireni alagubicaj guijga, luxh najcni te guiroduxh. ⁵ Che biu'reni nen biliääga, bahuiireni lo te bi'n sobga' ladbee nen biliääga. Najcw bi'nga te ladnol ni najc siool. Dxejc bidxejb regunaaga. ⁶ Dxejcti räjp bi'nga lojreni:

—Na'c guidxejbtu. Caguiiltu Jesús ni siääd Nazare't, nani cuaj lo cruzj. Rutiruni ree. Agubajnni lo rebengut, coltahuii cadro gudixhreni tiejxhni. ⁷ Colchäj, colchaye'tz lo rexpejnpacni, loj Pedr, ganidla Jesús guidzujn Galilee, dxejcti guidzujntu. Ro'c fiitu lojni, si'cni guniini lojtu.

⁸ Biriitireni ro' biliääga, racejslireni sa'csi cadxejbreni. Rut lojdi guniidireni sa'csi cadebduxhreni.

Balui loj Jesús loj Marii Magdalen

(Jn. 20:11-18)

⁹ Gubajñ Jesús loj rebeṅgut rsildooru che biu' xmaan. Baluilojni galoo loj Marii Magdalen, nani agacgulääni gajdz beṅdxab neṅ lastooni. ¹⁰ Dxejcti huij Marii Magdalen, huiye'tzni loj renani cuansañ Jesús, renani cayac-huin lajzni, cayoonreni. ¹¹ Che biejn diajgreni ahuäzsac Jesús lo rebeṅgut, luxh Marii abahuii lojni, di lajzreni nilii.

Baluiloj Jesús loj tiop xpejn pacni
(Lc. 24:13-35)

¹² Ste'ca najc Jesús baluilojni loj tio'p renani sasaj sääreni lo nejz. ¹³ Dxejcti gubi'reni, huiye'tzreni loj sgaiga, luxh nicla xtidx reni'c di lajzreni nilii.

Baxhal Jesús repost
(Mt. 28:16-20; Lc. 24:36-49; Jn. 20:19-23)

¹⁴ Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebeṅgut. ¹⁵ Räj p Jesús lojreni:

—Cołchäj guideb lo guedxliuj, colnii xtidx Dios lo guiraa rebejn. ¹⁶ Nani chalilajz luxh tiobnisni, siliaani loj dojl; biäda nani di lajzni chalii sinijtni lo dojl. ¹⁷ Niluxh remilagwre jiannäj renani chalilajz: sibääreni beṅdxab xcuentä; siniireni ste'ca diidx; ¹⁸ guiniaazreni bäl con naareni; masque yäreni xhicos ni rugu't bejn, xhet gacdi'reni; susujreni naareni yejc rebenracxhuu luxh siajc rebenracxhuu.

Huä'p Jesús xhaguibaa
(Lc. 24:50-53)

¹⁹ Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. ²⁰ Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnni milagwr te gucbee bejn laapac xtidx Dios ni caniireni. Sugacni si'c.

Xtidxcoob Dios ni biädinä dad Jesucrist
New Testament in Zapotec, Mitla (MX:zaw:Zapotec,
Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

5cff1274-8dc3-5398-a94d-f6033bb363c9